


MGA HEBREOHANON,

KAPITULO KUWATRO

 ...mao ang makaila pa og dugang bahin sa atong mapanalanginong Ginoo. Ug mao kana ang atong—atong katuyoan sa panagkatigum dinhi, alang niana nga katuyoan, ug, usab, ang maiampo ang mga may sakit nga anak sa Dios. Ug kaganinang buntag nagkaaduna kita og usa—usa ka maanindot nga panalangin gikan sa mga Kasulatan.

² Ngani atong ginapaningkamotan nga hisgotan, sa matag higayon sa panerbisyo, ang usa ka bahin sa... Nagatudlo ako sa Basahon sa Mga Hebreohanon, sulod sa, nangaging pila na ka semana karon. Ug bueno, kung itugot sa Ginoo, atong padayonon sa Miyerkules sa gabii, dayon sa Dominggo sa buntag ug Dominggo sa gabii, padayon lang, samtang ania pa ako nianang higayona. Dili ingon nga usa gyud ka rebaybal, pero rebaybal na man kining, panagtigum nato sa regular nga mga gabii. Ug busa kita’y malipayon gyud, kaayo nga magkaaduna niini nga higayon para mahimamat ang atong buutan nga mga higala gikan sa duol nga mga lungsod, ug sa palibot dinhi sa Falls Cities. Ug kung—kung mahitabo man nga aduna kita’y kanselahon o unsa man, tingali’g pangunahan kita sa Ginoo, sa dili madugay, aron... tingali’g mahimo kitang magpahigayon og pipila ka gabii, siguro, sa gym o kon asa man, sa dili magdugay, kung pangunahan man kita sa Ginoo sa ingon-ana nga direksyon, sa usa ka dapit kon diin mahimo natong matigum ang atong mga katawohan.

Ug nakita man gud nato ang mga nagapanambong, pagmanganhi sila, nanag-ingon, “Wala na’y espasyo para—para makasulod.” Siyempre, gamay ra man kaayo ang tabernakulo. Pipila lang gayud, ka mga tawo ang makalingkod dinhi, ug mao nga malipayon kaayo kami nga natinguha gihapon kamong motambong ug molingkod taliwala sa kainit, aron magpatalinghug sa Pulong sa Ginoo. Ug ginaampo namo nga ang Dios magapanalangin kaninyo sa labing, madagayaon gayud ug magatabang kaninyo.

³ Ug karon, niining gabhiona, buut natong, magsugod kita sa ika-4 nga ka-... Pila ba ang ania kaganinang buntag? Patanaw sa inyong mga kamot. Oh, pagkanindot, halos tanan man diay kaninyo. Ug anaa kita sa, magsugod na, sa ika-4 nga kapitulo sa Basahon sa Mga Hebreohanon. Oh, pagkamaanindot gayud nga Basahon! Nangalipay ba kamo Niini? [Nagaingon ang kongregasyon, “Amen.”—Ed.] Ug ginatakdo mismo niini ang Kasulatan sa Kasulatan.

4 Ug si Pablo, adisir siya nagtestimonyo bahin sa iyang kasinatian, gikinahanglan niya una nga moadto sa Arabia ug hibaloan, pinaagi sa Pulong kung kadto ba'y Kamatuoran. Gusto ko kana. Ug sa leksyon kaganinang buntag, nahibaloan nato, sa pagtudlo kaganinang buntag, nga si Cristo mao sa gihapon kagahapon, karon, ug hangtud sa kahangturan. Ug nasayran ni Pablo nga ang mao ra mismo nga Haliging Kalayo nga nanguna kaniadto sa mga anak sa Israel, ang misugat kaniya sa dalan paingon sa Damascus. Nahibaloan nato nga ang maong Haliging Kalayo, nga nanguna sa mga anak sa Israel didto sa kamingawan, paingon sa yutang saad, mao ang misugat kang Pablo sa dalan paingon sa Damascus, ug nga gitawag ang Kaugalingon Niini nga, "Jesus."

5 Dayon nahibaloan nato ang tinuod nga labing-hataas nga pagka-Dios ni Jesus Cristo. Kining tibuok Libro mao mismo ang kapadayagan ni Jesus Cristo. Ug mianhi Siya, nahibaloan nato nga, "Sa nagkalainlaing mga panahon ug nagkalainlaing mga paagi, ang Dios nagpakig-istorya sa atong mga ginikanan pinaagi sa mga propeta; og sa niining kaulahiing mga adlaw pinaagi na sa Iyang Anak, nga si Jesus Cristo, gipadayag Niya ang Iyang Kaugalingon." Ug ang maong Libro gikan sa Genesis hangtud sa Pinadayag walay lain kondili ang walay hunong, walay katapusan, nga kapadayagan ni Ginoong Jesus.

6 Ug nahibaloan pud nato nga Siya Mao kadtong atua sa nagadilaab nga sapinit. Nahibaloan nato nga Siya Mao kadtong kauban na sa Dios sa wala pa matukod ang kalibutan. Ug nahibaloan nato nga, sa Bag-ong Tugon, magkauban nga, Siya'y Dios ug Tawo. Ug dayon sa dihang mibiya Siya sa Bag-ong Tugon, aron moadto na sa Langit, Siya miingon, "Gikan Ako sa Dios, ug mobalik Ako ngadto sa Dios."

7 Ug dayon sa dihang natagbo Siya ni Pablo, atua na Siya sa mao gihapon nga porma Niya kaniadtong gipangunahan Niya ang Israel, ingon nga usa ka Haligi nga Kalayo. Ug gitutokan Siya ni Pablo sa nawong mismo, nga wala pa niadto nakabig, ug naghinungdan kadto nga magkaaduna siya og sakit sa mata sa tanan niyang nahibilin nga mga adlaw. Nabuta siya, ug sulod sa pipila ka adlaw wala gayud siya'y makita. Gikinahanglan pa siyang giyahan paingon sa usa ka dalan nga gitawag og Matul-id.

8 Ug ang Dios adunay usa ka propeta didto nga Iyang giistorya, nga ginganla'g Ananias, nga miadto, tungod sa usa ka panan-awon, ug gipandong ang mga kamot niya nganha kang Pablo, ug miingon, "Igsoong Saulo, dawata ang imong igtatan-aw."

9 Ug atong nahibaloan, usab, nga kadtong mao ra nga Balaang Espiritu, ang mao ra nga Ginoong Jesus, ang miadto kang Pedro

sa porma nga usa ka Kahayag ug gipahigawas siya gikan sa bilanggoan.

¹⁰ Ug nahibaloan nato nga ang mao ra nga Ginoong Jesus, sa niining mga adlaw, anaa sa gihapon sa maong Haligi nga Kalayo (Kahayag) nga nagapanguna sa Iyang katawohan (ang Iyang Iglesia), sa pagpamuhat sa mao gihapong butang, nagahatag og mga panan-awon; nagaabot ug nagapandong og mga kamot nganha sa mga tawo, pinaagi sa usa ka panan-awon. Ang Ginoong Jesus, Nga nakigtagbo niadtong miaging Dominggo sa buntag didto sa balay, ug miingon nga adunay usa ka lalaki ang magaabot, itum ang buhok, nga giuban na. Usa siya ka Griyego. Hamtong na ang pangidaron sa iyang asawa, ug magahilak didto sa may altar.

¹¹ Ngani may pipila ka mga tawo ang naghisgot bahin niadto, ug nasayod na nga mahitabo kadto. Siya’y baldado na, tungod ang—ang ugat sa iyang ulo nga para sa panghinimbang nawala na man. Dili na gani niya mahimong ilihok ang iyang mga tiil o ang iyang mga bitiis. Ug buta pud siya. Ug ang duha ka kapanghimatuoran niini: gipaduol ko una ang usa ka luoy’ng babaye og aron maiampo ang mga may sakit, dayon, mibiyo ako ug gipaduol si Igsoong Tom para mag-ampo. Ug kami, nga ania dinhi, gibantayan kadto nga mahitabo. Ug pagkahuman minaug ako ug nag-ampo para sa mga may sakit, ug misaka’g balik. Ug miduol ang maong babaye, eksakto gayud nga sumala sa panan-awon, ug gihawiran ako diha sa bukton ug misugod sa paghilak, ug miingon nga si Dr. Ackerman kono ang nagpaanhi sa ilaha dinhi. Si Dr. Ackerman usa ka suod kong higala, nga Katoliko. Ang anak niyang lalaki usa ka pari sa monasteryo didto sa—sa sa Saint Meinrad, dinhi sa Indiana. Ug taga Jasper kining maong lalaki. Ugi gayo siya sa Ginoo, gikan niadto nga wheel chair. Makatindog na siya ug makalakaw na. Makakita na pud siya og ayo nga sama ni kinsa pa man. Ug migawas siya sa bilding, nga normal ug naayo na. Ang tanan niadto tungod sa usa ka panan-awon!

¹² “Igsoong Saulo, ang Ginoong Jesus nga nagpakita kanimo sa dalan, mao’y nagsugo kanako aron nga maipandong ko ang akong mga kamot nganha kanimo, aron nga makakita ka na ug mapuno sa Espiritu Santo.” Makahibulongan.

¹³ “Dayon nasayran nato, ingon nga nakita nga naangkon na nato kini nga kaluwasan, dili nato angay. . . Dili kita makaikyasa sa mga silot ug kapungot sa Dios, kung talikdan tà ang maong dakung kaluwasan.”

¹⁴ Karon magsugod na kita sa pagbasa, karong gabhiona, dinha, ug sugdan ang ika-4 nga kapitulo sa Basahon sa Mga Hebreohanon. Kung adunay gustong magsunod sa pagbasa, aduna kita’y pipila ka Biblia dinhi. Kung aduna ma’y gusto, aba, usa sa mga usher ang magdala niini sa inyo, ipataas lang ang

inyong kamot, para niining—niining mga Biblia. Kung mahimo usa unta sa mga igsoon dinhi ang mokuha. . . Aduna ma'y duha ka Biblia nga nakabutang dinha, sa tan-aw ko.

¹⁵ Ug karon dalion na nato, tungod aduna pa kita'y komunyong pagkataudtaud. Ug kon asa kita mahuman karong gabhiona, nan ipadayon ra nato sa Miyerkules sa gabii. Bueno, nagtoo ko, kaganinang buntag sa atong pagbasa, nagsugod kita sa ika-15 nga bersekulo.

¹⁶ Aduna, tingali sa inyo ang wala pa nakahibalo nga nagasul-ob ako og antipara, para sa pagbasa. Nagakatigulang na man gud ko. Ug makabasa man gihapon ko, pero dili na ako makabasa og ingon ka paspas, ilabina pag gagmay ang ginabasa ko dinhi, gagmay ang mga letra.

¹⁷ Ug mao nga miadto ako para magpaeksamin sa akong mga mata, para mahibaloan pud kung nagakahalap na ba gayud ang akong panan-aw. Pero ten-ten man ang akong mga mata. Ingon siya, “Apan lagpas kuwarenta ka na man gud, iho.” Aduna siya'y gipabasa sa ako, miingon, “Sugdi kana pagbasa.” Gibasa ko kadto. Ug samtang nagakaduol ako, ginapahinay ug ginapahinay sàb niya kadto. Ug pag-abot sa *ingon-na-niini* ka duol, mihunong ako. Dayon gibalhin niya kadto sa tenten, nabasa ko gihapon kadto sa bisan asa. Pero miingon siya, “Ang nagakahitabo man gud, pag molagpas na ka og kuwarenta, nagakanipis na ang imong mga kalimutaw.”

¹⁸ Bueno, mahimo man nakong isingkit ang akong mga mata ug mabasa kana nga *ingon-ana* ka duol kanako, pero kinahanglan mo pang isingkit ang imong mata. Busa, gihimoan ko niya og usa ka pares sa antipara. Makakita na ako, bisan asa, bisan pa kon duol ra kaayo sa ako. Karon, pagtangtangon kini kanako, dili ko na makita kining mga butanga. Pero mabasa ko kini, mabasa kini kon gamit ang antipara.

¹⁹ Bueno, kaganinang buntag, nahisgotan nato ang ulahing bahin sa ika-3 nga kapitulo sa Mga Hebreohanon. Ug, oh, madagayaon gayud nga mga unod ang atong nakaplagan! Karon paminaw, buut kong mobasa pag-usab, aron aduna kita'y basihanan karon. Dili na nato ingon nga hisgotan gyud kini, kondili medyo sublion lang kini og diyutay.

Samtang ginaingon, Karong adlawa kung kamo. . . magapatalinghug sa iyang tingog, ayaw ninyo pagahia ang inyong mga kasingkasing ingon sa paghagit.

Kay kinsa, kanila, sila nga nakapatalinghug na sa Pulong, sa nanagpakadungog sila sa Pulong, nanaghagit: dili ba ngatanan sila nga namahawa sa Egipto pinaagi kang Moises.

²⁰ Bueno, dinha, kaganinang buntag, nahibaloan nato nga Siya miingon, “Ayaw n'yo pagahia ang inyong kasingkasing karon, nga sama sa mga adlaw sa paghagit.” Mao kadto ang panahon

nga ilang gihagit ang Dios sa pagkasuko, tungod kay gihatag na man Niya sa ilaha si Moises, ang Iyang propeta, ug ang usa ka ilhanan nga nagauban kang Moises. Pila ba, dinhi sa kongregasyon karong gabhiona, ang nakahibalo kung unsa nga ilhanan kadto? Haligi nga Kalayo, Mga Hebreohanon 13.

²¹ Karon, wala kita masayod kon nakita ba sa maong mga tawo kadto nga ilhanan o wala. Apan nakita Kadto ni Moises, kay natagbo na man Siya una ni Moises sa usa ka nagadilaab nga sapinit. Usa Siya ka Kalayo. Ug misunod ang mga anak sa Israel kang Moises, ug gibiyaan ang Egipto. Ug sa diha nga nahigawas na sila sa Egipto, ang Dios, nahibaloan nato, nga gihatud sila ngadto mismo sa usa ka lit-ag. Kon diin, nanaggukod kanila ang kasundalohan ni Faraon, ang Dagat nga Mapula anaa pud sa isig ka kilid, ug gisulayan gyud sila sa Dios; ug nangahadlok sila. Ug nasuko ang Dios tungod niadto. Miingon Siya, “Nganong nanagtuaw kamo Kanako?” Miingon, “Isulti n’yo lang ug magpadayon kamo.” Gusto ko kana.

²² Bueno, nanagsunod sila kang Moises, ingon nga nagsunod pud si Moises sa maong Haligi ug Panganod, ug nagpaingon na sila kaniadto sa yutang saad. Usa kini ka maanindot nga hulagway sa Iglesia, karong gabhiona, sa pagpaingon sàb nato ngadto sa Yutang saad, nga ginapangunahan sa mao gihapon nga Espiritu, og sa mao gihapon nga mga ilhanan ug mga katingalahan nga gisulti kaniadto sa Dios.

²³ Karon matikdi n’yo. Dayon, nahidangat sila ngadto sa Kamingawan sa Sala. Ang—ang mga tubig didto “mapait,” *Mara*. Nganong gihatud man sila sa Dios ngadto sa mapait nga mga tubig? Mahimo man unta Niya nga ihatud sila ngadto sa maayo nga tubig. Apan gihatud Niya sila ngadto sa mapait nga mga tubig aron nga Iyang mapamatud-an ang ilang pagtoo. Gusto Niyang buhaton ang ingon-ana. Gusto Niyang tugotan nga moabot sa inyo ang mga kalisdanan, aron maipasundayag Niya kaninyo ang Iyang gugma ug ang Iyang gahum. Pero nganong mahimo man sa mga tawo, sa karong panahon, nga wala nagatoo sa Dios nga nagapamuhat og milagro, pag nagaabot ang mga kalisdanan, basta na lang silang mosurender ug kon unsa na lang? Pero kita nagatoo gyud nga “nagapamuhat og mga milagro ang Dios.” Dili Niya mahimong. . . kinahalanglan sa Dios nga. . .

²⁴ Paminawa n’yo kini. Kung dili mamuhat ang Dios sa mao gihapon nga paagi, pag mahitabo ang mao gihapon nga panghitabo, kung ingon-ana saypan ang Dios ingon nga may ginadapigan sa Iyang mga katawohan. Ang pagkagamhanan sa Dios ang nagasugo Kaniya nga mamuhat diha sa matag panghitabo nga sama kaniadtong namuhat Siya sa unang panghitabo, kay kon dili nan nasayup diay Siya kaniadtong namuhat Siya sa unang panghitabo. Kung dili mamuhat ang Dios sa mao gihapon nga paagi nga gibuhat Niya sa unang

panghitabo, kung mamuhat man Siya og lahi sa ikaduhang panghitabo, nan nasayup diay Siya kaniadtong namuhat Siya sa unang panghitabo. Kung giayo sa Dios ang mga may sakit sa Daang Tugon, kinahanglan buhaton gihapon Niya kana sa Bag-ong Tugon ug sa karong panahon, kay kon dili nan nasayup diay Siya sa dihang giayo Niya sila kaniadto. Kinahanglan gyud nga mamuhat Siya sa mao gihapon nga paagi, sa tanang higayon. Ug buhaton gyud Niya kini, kon matagbo sa mao gihapon nga pagtoo ang maong kahimtang. Anaa na sa ato ang sayup, dili sa Dios. Tungod kay nasaksihan na nato Siya sa pipila, ug sa kadaghanan, nga nagapamuhat og dagku og talagsaon nga mga milagro. Nasayod kita niana. Mao nga dili puedeng moingon ang kritiko, “Dili man kana tinuod.” Tungod kay nasaksihan mismo nato nga ginapamatud-an Niini kana, ug tinuod mismo kana.

²⁵ Ginaingon nila kaniadto, “Pakitai ako og usa ka milagro.” Dili na nila masulti pa ang ingon-niana. Dili na kana masulti pa sa siyensiya. Tungod bug-os man natong mapamatud-an ngadto sa kalibutan sa siyensiya. Ug nasaksihan mismo sa kalibutan sa siyensiya nga ang usa ka supernatural nga Persona, diha sa porma nga usa ka Haliging Kalayo, ang nagauban kanato. Ngani ania man ang Iyang retrato, dinhi mismo, ug ang usa niini nakasab-it mismo didto sa Washington, DC, karong gabhiona. Kini ang mao ra gihapon nga Cristo.

²⁶ Busa, sama kaniadto, ginaingon kanako sa mga igsoon kong ministro kasagaran, “Oh, Igsoong Branham, ang yawa kana. Ayaw pagpatonto niana.” Ila akong gihadlok.

²⁷ Ug ayaw kong iwali kini hangtud nga miabot ang Dios ug gipadayag kini, nga, “Siya ang mao gihapon nga Jesus, ang Mao rang Jesus.” Oh, dayon bisan sulayan n’yo pa nga tay-ogon kini pagawas kanako? Dili gyud mamahimo. Tungod kay, kini man mao ang Kasulatan. Kini mao ang Pulong sa Dios. Dili kini nga usa lang ka kasinatian nga walay basihanan. Kondili usa kini ka kasinatian nga suportado sa Pulong sa Dios ug sa mapanalanginong Eternal nga saad sa Dios.

²⁸ Karon, namatikdan nato dinhi, dapit, nga miingon Siya.

Kay kinsa kanila, sa nanagpakadungog sila, nanaghagit: . . .

Sigurado. Nangabudlayan sila, sa matag higayon nga midangat sila ngadto sa usa ka pagpakigsangka. Dayon unsa ma’y gipangbuhat nila? Nangasuko sila, ug nangaluya, ug gusto na nilang mamalik, ug, “Nganong nahitabo man *kini* sa ako?”

²⁹ Katingalahan gani, kaganinang buntag, human kong giwali kini kutob sa akong mahimo, daghan ang miduol sa may altar ug giduhaduhanan Kini, “Nganong nagakahitabo man kini sa ako?” Nakita n’yo na kung unsa Kini? Nagalabay lang Kini ibabaw sa ulo sa mga tawo. Mao ra gihapon, nga mga tawo.

30 Ang ingon ni Jesus, “Aduna kamo’y mga mata, apan dili kamo makakita.” Gisulti Niya kana sa mga tinun-an.

31 Miingon sila, “Ania, karon nagasulti na Ikaw sa yano gayud. Karon nagatoo na kami. Walay ni usa ang kinahanglang mosulti pa Kanimo og bisan unsa, tungod kay ginapakita man kini Kanimo sa Dios.”

32 Ingon Siya, “Nagatoo na ba kamo karon, human sa tanan niining panahon?” Kita n’yo?

33 Dili n’yo gayud angay’ng duhaduhaan ang Dios, sa bisan unsa man. “Kay ang paglakaw sa matarung gitukod sa Ginoo.” Ug ginapapas-an sa inyo ang matag pagsulay, aron pamatud-an kamo. Ug ang ingon sa Biblia, “Ang mga niini labi pa ka bililhon kaysa bulawan para kaninyo.” Busa kung ginatugot sa Dios nga mahitabo kanimo ang pipila ka magaan nga mga kasakit, hinumdumi, para kini sa pagtul-id kanimo. “Ang matag anak nga nagaduol sa Dios kinahanglan una nga mapanton sa Dios, ug masukulayan, binansay nga anak.” Walay mga dili-apil. “Ang matag anak nga nagaduol.” Ug kini nga mga kasakit nagakahitabo, ginapahitabo aron makita kung unsa ang inyong taras. Kita n’yo? Ang Dios kini, diha niining dapit sa pagpamatuod. Ingon niana ang yuta, dapit kini kon diin kita ginasukulayan, ug kon diin Niya kamo ginapamatud-an.

34 Karon paminaw mo, sa atong pagpadayon. Ug gusto kong hisgotan ang ulahing bahin niini.

Ug kang kinsa siya nanumpa nga sila dili makasulod sa iyang kapahulayan, . . .

Bueno, dinha kita paingon, karong gabhiona.

. . . sa iyang kapahulayan, kondili mao kadtong mga masupilon?

Ug nakita ta nga wala gayud sila makasulod . . . tungod sa pagkawalay-pagtoo.

35 Karon, unsa ba ang sala? Dili-pagtoo. Miabot kanila ang Dios, diha sa usa ka Haligi nga Kalayo; gipadala ang Iyang propeta, ug gidihogan siya, gihatagan siya og mga ilhanan para ipamuhat atubangan sa mga katawohan. Ug pagkahuman niadto ang Haligi nga Kalayo, pinaagi sa propeta, ang nanguna sa pagpahigawas kanila. Pero sa matag kahimtang nga ilang madangatan, sugdan dayon nila ang pagbagulbol ug ang pagsulti-sulti sa matag gamay’ng sayup nga ilang makita kang Moises, mosugod dayon sa pagbagutbot ug pagyawyaw batok kang Moises. Ug wala niadto nahimuot ang Dios, sa hinungdan nga miingon Siya nga nanagpakasala sila.

36 Naminaw unta sila. Pero, imbis nga ingon niana, naminaw hinoon sila sa pangatarungan, “Unsaon man niini pagkahitabo? Unsaon man pagkahitabo niining mga butanga?” Kung Dios Siya, nan ang tanan-tanan mamahimo. Ug himoon Niya ang

tanang mga butang nga masigtabang alang sa ikaayo niadtong mga nahigugma Kaniya.

³⁷ Karon paingon na kita sa usa ka dakung pagtuon dinhi, nga, mahitungod sa, “Kapahulayan,” ang *sabbath*. Bueno, mga magpapanaw sila kaniadto nga atua sa ilang panaw. Kita n’yo? Dugay na sila didto sa Egipto, upat ka gatus ka tuig, ug napailalum sa pagkaulipon. Ug ginapahigawas na sila pinaagi sa mga milagro sa Dios, sumala sa Iyang saad. Ug atua na sila sa dalan nila paingon sa yutang saad. Ug nagpakita didto ang usa ka supernatural nga Kahayag, sa taliwala nila, ug misugod sa pagpanguna kanila.

³⁸ Bueno, adunay moingon, “Karon, tan-awa n’yo, kinsa ba kining si Moises? Kinsa ba’y nagpahimutang kanimo aron mao’y mangulo kanamo? Dili ba usa ka ra man sa amoa? Kinsa ma’y nagbutang kanimo dinhi aron mahimo namong tigpangulo? Nagahunahuna ka ba mas nahibalo ka pa kaysa sa among pastor? Sa hunahuna mo ba mas nahibalo ka pa kaysa sa pari? Sa hunahuna mo ba mas maantigo ka—ka pa kaysa sa relihiyoso namong mga kalalaken-an, sa niining panahon?” Wala kana’y kahilambigitan niini.

Ang Dios kadto, sa Haligi nga Kalayo, nga nagapanghimatuod nga Siya mao ang nagapamuhat. Walay diperensya kung kinsa ang maantigo ug kung kinsa ang dili maantigo. Ang ideya niini mao nga sundon nila kung unsa ang gipahimutang sa Dios sa ilang atubangan.

³⁹ Aba, si Moises, kung tan-awon sa pisikal, daw sa hinangal nga butang ang gibuhat niya sa dihang gipaningkamotan niyang ipahigawas ang mga anak pinaagi sa Pulong sa Dios, gidala ang usa ka grupo sa mga tawo paingon ngadto sa kamingawan. Sa dihang aduna man siya’y. . . Aba, siya baya ang manununod sa tanan-tanan nga aduna sila kaniadto. Ang tanang kasundalohan, sa tibuok kalibutan, napildi gani niya. Ug atua siya, ingon nga usa ka bantugang heneral sa kasundalohan. Ug ang sunod, siya pud kaniadto ang mamahimo nga hari, Faraon sa Egipto. Aba, mahimo man niya unta nga pag-anaa na siya trono, ug mahimo siyang moingon, “Sige, mga anak, pamalik na mo sa inyong lugar.” Sulbad na unta; usa man siya ka Faraon. Apan si Moises. . .

⁴⁰ Oh, ania. Si Moises, pinaagi sa *pagtoo*, nakita niya ang saad sa Dios. Ug human nga giduaw siya sa Manulonda sa Ginoo, mas daghan na siyang nahibaloan mahitungod sa Dios, sulod ra sa singko minutos nga anaa siya sa Presensiya niadtong Manulonda, kaysa sa natun-an niya sa mga magtutudlo nga atua sa Egipto sulod sa kuwarenta ka tuig. Hingsayran niya nga Siya gyud diay. Nakita niya ang mga supernatural na naipamuhat.

41 Miingon ang Dios, “Ako magauban kanimo, Moises. Ako magauna kanimo.” Ug nasabtan nila. Ug Iyang gihatagan siya og mga ilhanan para ipamuhat.

42 Bueno, atua na sila kaniadto sa dalan paingon sa yuta nga kapahulayan. Gihatagan sila sa Dios og kapahulayan, usa ka dapit kon diin dili na nila kinahanglan pang. . . mapailalum sa mga tinugyanan nga nagapangulo kanila, aron patrabahoon sila, aron pugson sila sa pagpabuhat og mga butang.

43 Pagkaanindot kini nga hulagway sa karong panahon, sa diha nga atong matan-aw ang iglesia sa kahimtang niini. Ang matag tawo nga natawo na sa Espiritu sa Dios ginasalikway gyud ang kalibutan, “Ug kung nahigugma kamo sa kalibutan o sa mga butang nga iya sa kalibutan, ang gugma sa Dios wala man lang diha kaninyo.” Mao kana ang giingon sa Biblia. Ug ang tinuod nga magpapanaw, diha sa iyang dalanon, nagadumot gayud sa mga butang nga iya sa kalibutan. Nagakapungot siya nga makakita og mga kalalaken-an nga nagainom og ilimnong makahubog. Nagakapungot siya nga makakita og mga kalalaken-an nga nagapanigarilyo. Nagakapungot siya nga makakita og mga kababayan-an diha sa dalan, nga nagasul-ob og mubong mahilas nga mga bisti. Nagakapungot siya nga makakita og mga party-party sa pagdula og bunco ug baraha.

44 Ug kagahapon, samtang si Igsoong Tony. . . o kami ni Igsoong Wood nagalakaw sa dalan, ug uban sa pipila pa, pipila ka mga kalalaken-an. . . Adunay usa ka gamay’ng babaye didto sa Louisville, nga nagalakaw pud didto sa dalan, matahum nga babaye, nga nagsul-ob og mahilas nga bisti; nga ubos ra gamay sa bat-angan, ug dunay gamay’ng laso nga nakahikot sa iyang bat-angan, sa isig ka kilid, ug dunay diyutay kaayo nga pinalingin nga bahin sa panapton diha sa iyang atubangan, ug gihikitan lang og panghikot diha sa likod. Nagalakaw-lakaw didto sa dalan, nga mahilas gayud, ug ang matag lalaki didto sa dalan nagatan-aw gud sa iyaha. Ingon ko, “Wala gyud niya naamgo nga sad-an siya, diha sa atubangan sa Dios, tungod sa pagpanapaw uban ang matag lalaki nga mitan-aw sa iyaha sa ingon-anang paagi. Ug manubag gayud siya sa adlaw sa paghukom tungod sa pagpanapaw uban nianang mga kalalaken-an.”

45 Ang ingon ni Jesus, “Ang si kinsa man nga nagatan-aw sa babaye nga may pagkaibog kaniya, nakapanapaw na uban kaniya.” Husto kana.

46 Busa, nakita n’yo, miingon kanako si Igsoong Wood, “Unsa kaha ang nagapahinungdan niana, Igsoong Branham?”

47 Ingon ko, “Mahimong tungod kana sa problema sa pangisip o kaha giyawaan siya.” Duha lang man ka butang ang magpahinungdan niana. Tungod ang usa ka desente, mahinlo nga babaye dili man magsul-ob og mga ingon-anang

butang gawas lang kon siya giyawaan. Mao gayud kana ang Kamatuoran.

48 Karon, ang usa ka magpapanaw nga paingon sa Langit, nagakinabuhi siya diha sa lahi na nga kahimtangan. Dili mo na kinahanglang mabalaka pa kon makatan-aw man siya sa maong babaye. Siguradong ilingiw gyud niya ang iyang ulo, kung anaa sa iyang kasingkasing ang Dios, tungod kay nagakinabuhi man siya sa usa ka kahimtangan nga usa ka milyon ka milya ang kalay-on gikan nianang mga butanga. Husto kana. Dili mo gustong mamahimong sad-an tungod sa ingon-anang mga butang, didto sa paghukom. Busa ilingiw niya ang iyang ulo ug moingon, “Dios, kaloy-i intawon ang maong babaye,” ug magpadayon na siya. Anaa sàb kita sa atong panaw. Anaa na kita sa atong dalan paingon sa Yuta sa Canaan. Paingon na kita sa Eternal ug mapanalanginong Kapahulayan nga gikahatag kanato sa Dios. Ug diha sa maong panaw, ginatintal kita. Ginatintal kita sa tanan nang matang sa mga butang, apan bisan ginatintal kita wala kita nagapakasala.

49 Karon matikdi, samtang mopaingon kita sa ika-4 nga kapitulo, “Busa mangahadlok kita.”

Busa mangahadlok kita, kay tingali unya, sanglit may saad nga gibilin aron makasulod sa iyang kapahulayan, . . .

50 Gusto ko nga inyong hinumduman, nga, gawas kon mahibaloan nato, gawas kon ipadayag kini sa Dios kanato! Bisan pirmi pa kitang nagasimba, wala kana’y unsa man nga kahilambigitan niini. Kinahanglan nga moabot ang Dios pinaagi sa kapadayagan ug ipadayag ang Iyang Kaugalingon nganhi kanato, nga mao’y magatangtang sa tanang mga butang nga iya sa kalibutan. “Karon, samtang ginaingon kini, ‘Karong adlawo kung kamo. . .’”

51 Karon sugdan na nato ang—ang ika-4 nga kapitulo.

Busa mangahadlok kita, kay tingali unya, sanglit may saad nga gibilin aron makasulod sa iyang kapahulayan, . . .

52 Karon timan-i n’yo, sa dihang atua sila sa dalan paingon sa Kapahulayan, gipangunahan sila sa Haligi nga Kalayo. Karon buut natong masayran, “Unsa ba kini nga Kapahulayan?”

Mangahadlok . . . kita, kay tingali unya, sanglit may saad nga gibilin aron makasulod sa iyang kapahulayan, (matikdi n’yo), may bisan kinsa kaninyo nga daw dili makakab-ot niini.

53 Karon, ania ang saad. Mao kini ang angay natong kahadlok: kung wala’y saad nga gibilin kanato. Apan aduna man gyu’y saad! Ug kung ingon-ana, ang sunod, likayi gyud nga dili kamo makakab-ot niini.

54 Karon, ang hunahunaon nato, nga kung nagapaingon na kita ngadto sa Kapahulayan, nan unsa ba ang maong Kapahulayan? Asa man kini? Kini ba’y pagpamiyembro sa iglesia? Kini ba’y pagpabautismo sa usa ka pamaagi? Kini ba’y pagkahimong miyembro sa pinakabantog nga iglesia sa siyudad? Pagbisti ba kini og mas maanindot nga mga bisti? Edukasyon ba kini? Salapi ba kini, aron mahimo na kitang moundang sa pagpanarbaho ug magrelaks-relaks na lang, og magpahulay na na lang sa tibuok natong kinabuhi, sama sa tawag nato niini? Dili kini ingon niana.

55 Paminawa n’yo ang ginaingon sa Biblia kung unsa kini, ug kung unsaon nato sa pagpakaangkon niini.

Busa mangahadlok kita, kay tingali unya, sanglit may saad nga gibilin aron makasulod sa iyang kapahulayan, may bisan kinsa kaninyo nga daw dili makakab-ot niini.

Kay sa pagkamatuod (sa panahon kaniadto) ginawali usab nganhi kanato ang ebanghelyo, ingon usab kanila: . . .

Unsa man ang Ebanghelyo? Ang maayong balita. Miabot ang maayong balita ngadto kanila sa Egipto, nga, “Ang Dios nagpadala og usa ka manluluwas, ug ipahigawas Niya kita ug dalhon kita ngadto sa yutang saad.”

56 Ang maayong balita kanato sa karon, mao nga, “Nagpadala ang Dios og usa ka Manluluwas, ang Espiritu Santo, ug paingon na kita sa Yutang saad.” Sa karon gihimo kini sa mga tawo og mga kredo ug mga denominasyon, apan ang Dios sa gihapon nagapabilin, nga, ang atong *Kapahulayan* mao “ang Espiritu Santo.”

57 Himatikdi.

. . . ginawali na ang ebanghelyo . . . ngadto kanila ingon usab kanato: apan ang pulong nga hingdunggan wala nila pagpusli, ang . . .

Hinumdumi:

. . . ang pulong nga hingdunggan wala nila pagpusli, tungod kay wala pag-ubani sa pagtoo niadtong mga nanagpakadungog.

58 Oh, mga igsoon ko, mohunong sa ko dinhi sa makadiyut. Bisan pila pa ka higayon igawali ang Pulong, unsa man ninyo ka gusto ang paagi sa pagkawali Niini, kung dili kamo mismo usa ka mag-aambit Niini, nan dili gyud Kini makahatag og unsa man nga kaayohan kaninyo.

. . . tungod kay wala pag-ubani sa pagtoo sa niadtong mga nanagpakadungog.

59 Nasaksihan man nila ang mga milagro ni Moises. Ingon sila, “Maayo gyud kana.” Ug nangduol sila. Ilang-ilang nasaksihan

siya nga namuhat og mga milagro. Ug nakita pud nila ang Haligi nga Kalayo, tingali, o nadungog ang mga tawo nga naghisgot mahitungod Niadto. “Oh, maayo man kana.”

⁶⁰ Apan wala kadto pag-ubani og personal nga pagtoo. Kay sa dihadiha nga nahidangat sila ngadto sa kawanangan, sila (ang matag usa) misugod na sila sa pagbagulbol. Ug miingon ang Dios, “Tungod kay nagduhaduha sila, sala kana.” Ayaw n’yo duhaduhai ang unsa man. Tumoo kamo. Ayaw kamo pagduhaduha, bisan unsa pa ka malisud ang kahimtang, toohi n’yo Kini.

⁶¹ Bueno misugod na sila sa pagbagulbol, ug gilaglag sila sa Dios. Ug dayon nanumpa Siya, sa Iyang kapungot, nga, “Dili na sila makasulod sa Iyang Kapahulayan.” Ug miingon dinhi ang Biblia, nagtoo ko anaa Kini sa—sika-3 nga kapitulo, nga, “Ang ilang mga lawas nangapukan didto sa kamingawan.”

⁶² Sa ika-3 nga kapitulo ug sa ika-17 nga bersekulo.

Ug kinsa ang iyang mga gikasuk-an sulod sa kap-atan ka tuig? dili ba ang mga nagpakasala, kang kinsang mga lawas nangapukan didto sa kamingawan?

⁶³ Ug sa tanan kanila nga nanggawas sa Egipto, duha lang ang nakasulod sa yutang saad. Ngani sa tibuok kalibutan nga gilaglag pinaagi og baha, sa nangaging mga panahon, walo ra ka kalag ang naluwag, gikan niadtong binilyon. “Masigpit ang pultahan ug hiktin ang dalan, ug mamahimong diyutay ra ang makatultol niini.”

⁶⁴ Moingon ang ubang tawo, “Kung ingon-ana, Igsoong Branham, unsa man kining liboan nga gikaingon sa Biblia nga moatubang didto?”

Hinumdumi ninyo kung unsa ka daghan ang nangamatay sa matag henerasyon, nga mga Cristohanon, sa tanang mga nangaging kapanahonan. Silang tanan mangabanhaw man. Kana ang magalangkob sa Lawas. Basin ginadahum n’yo nga adunay usa ka gatus ka bilyon dinhi sa Amerika, ang mamangon, o mora’g ingon niana, sa niini nga kalibutan sa karong panahon. Tingali’g wala ra gani singkwenta ang mamangon. Apan ang mahimayaong tinubos nga Iglesia anaa ra sa abog, nanaghulat. Sila mao ang mga mutya sa Dios nga anaa sa abog. Apan ang ilang mga kalag anaa ilalum sa halaran sa Dios. Wala pa sila sa ilang husto nga kahimtang. Hinoon anaa sila sa usa ka lawas, tinuod, apan usa kana ka theophany. Ug nanagtuaw sila sa Dios, “Unsa pa ba ka dugay?” Makita pud nila ang usa’g usa, pero dili nila malamano ang mga kamot sa usa’g usa, sa ingon-ana nga matang sa lawas.

⁶⁵ Kung matagbo mo ang imong inahan sa Himaya karong gabhiona, kung motaliwan ka na, dili mo siya malamano tungod wala man siya’y ingon-ana nga matang sa kamot. Dili mo kana mabati nga sama sa mabati mo karon. Tungod kay, ang lima

man ka sensya nga gipahimutang dinhi niining lawasa, ang nagakontrolar niini. Mabati ang iyang presensiya sa lahi nga kahimtangan.

⁶⁶ Sama ra sa bana ug asawa. Wala na'y pagpangasawa, o pagpamana, didto sa Langit. Ngano man? Tungod aduna na man didto'y lahi nga matang sa gugma. Wala na pud didto'y pangibog sa pakighilawas. Ang tanan na nianang mga butanga nangagi na. Gihinloan na kamo ug giputli na.

Apan wala pa kamo nabuhi sa ingon-ana nga kahintang, tungod wala man kamo gilalang sa ingon-ana nga kahintang. Nagahulat lang kamo. Ug nagapangandoy kamo nga mahibalik sa kon diin gilalang kamo nga usa ka lalaki ug usa ka babaye, ug dinha pagabanhawon sa Dios kana nga lawas gikan sa abog sa yuta ug himayaon kana. Dayon makakita na kamo, makatilaw, makabati, makasimhot ug makadungog, ug makapakigkauban. Dili gayud nato masayran. . .

Dili gyud kita malipay sa kinabuhi nga iya sa Anghel. Tungod wala man kita gilalang ingon nga mga Anghel. Hinoon naglalang ang Dios og mga Anghel. Apan gilalang Niya kamo ug ako, ingon nga mga lalaki ug mga babaye. Kana mao ang mamahimo nato nga kahintang, hangtud sa kahangturan, sa Iyang mapanalanginong Pag-abot.

⁶⁷ Karon, kita n'yo na sa kung unsay hinungdan nga sila wala makakab-ot, tungod kay nakasala man sila ug nakabsan sa himaya. Gipakita sa Dios kanila ang Haligi nga Kalayo. Iyang gipakita kanila ang mga ilhanan ug mga katingalahan. Gipangunahan Niya sila pagawas. Gidala Niya sila sa pagsulay, aron sulayan ug pamatud-an sila.

⁶⁸ Bueno, dili ba nakasinati kamo og daghang mga pagsulay? Ayaw kamo pagbagulbol tungod niini. Managlipay hinoon kamo. Ang Dios nagauban man kaninyo. Ginasulayan ra Niyang pamatud-an ang inyong pagtoo. Tan-awa n'yo si Job sa Daang Tugon, kaniadtong miingon ang Dios, "Gipalandong mo ba ang Akong alagad nga si Job, usa ka matarung nga tawo, usa ka hingpit nga tawo? Walay sama kaniya diha sa yuta."

⁶⁹ "Oh," ingon niya, "tinuod, tungod Imo man siyang gipanalipdan: mao nga wala siya'y unsa man nga mga problema, walay unsa man nga mga kabalaka. Wala siya'y unsa mang problema sa pinansiyal, okey ra ang tanan. Wala siya'y unsa man nga balatian, og unsa man nga kasakit. Pero itugyan siya kanako. Himoon kong magapasipala siya Kanimo, sa Imong atubangan."

⁷⁰ Miingon Siya, "Anaa na siya sa imong kamot, apan ayaw ra gyud kuhaa ang iyang kinabuhi."

⁷¹ Oh! Gibuhat niya ang tanan gawas lamang sa pagkuha sa iyang kinabuhi, pero wala gayud niya natarug si Job. Nasayod man si Job nga mibarug siya nga lig-on sa Pulong. Husto

kana. Ug ang tanang mga yawa sa impiyerno wala man lang makatarug kaniya, kay nasayod man siya nga naihalad niya kadto nga halad. Matarung siya. Pero giakusahan nila siya, miingon, “Nakasala ka, Job, ug mao nga ginasilotan ka sa Dios.” Pero nasayod siya nga ang Dios walay . . . nga wala siya nakasala sa atubangan sa Dios. Nasayod siya nga siya’y matarung. Dili tungod kay usa siya ka maayong tawo, kondili tungod kay ginadawat sa Dios ang halad-nga-sinunog nga puli kaniya.

⁷² Ug, karong gabhiona, nasayod kita nga nagpamatuod ang iyang kinabuhi nga siya’y matarung. Ug kon kamo . . . Dili ingon nga makaadto kamo sa puloy-anan sa Himaya tungod kay ginapaningkamotan n’yong tabangan ang inyong silingan; maayo man kana. Dili tungod kay nagpamiyembro kamo sa iglesia; maayo man pud kana. Kondili tungod kay gidawat ninyo ang pagkamatarung ni Jesus Cristo mao nga makaadto kamo sa puloy-anan sa Himaya, dili tungod sa bisan unsa man nga gibuhat n’yo mismo.

⁷³ Karon, samtang padayon ta nga magbasa.

Kay sa pagkamatuod ginawali usab kanato ang maayong balita, . . . (ika-2 nga bersekulo) . . . ingon usab kanila: apan ang pulong nga hingdunggan wala nila pagpusli, tungod kay wala pag-ubani sa pagtoo niadtong mga nanagpakadungog.

Ang pagtoo wala kanila nga mga nanagpakadungog sa Pulong.

⁷⁴ Hunahunaa lang ninyo, sa karong panahon, sa gamay’ng, ubos nga ministerio nga gihatag kanako sa Ginoo, aduna na unta’y kuwarenta ka milyon nga mga Amerikano ang naluwas, karong gabhiona. Pero kabalo ba mo kung unsay ginaingon nila? “Aba, kana’y pagbasa ra sa hunahuna. Nagabasa lang siya og hunahuna. Wala gyu’y ingon-anang mga butang! Aba, dili gani siya miyembro sa among iglesia.” Kita n’yo? Kini’y dili . . . bisan unsaon pa nimo sa pagpahayag niini basi sa Pulong ug pamatud-an nga kini mao ang Pulong sa Dios, nga kini’y saad sa Dios, bisan unsa pa ka daghang siyensiya ang magpamatuod nga tinuod Kini, dili gyud gihapon sila makatoo. Miingon man ang Biblia nga dili sila makatoo.

⁷⁵ Miingon, “Kung ingon-ana unsa ma’y kapuslanan nga iwali pa Kini?” Gikinahanglan man gud nga magkaaduna ang Dios og saksi, aron kondenahon sila, nianang Adlaw. Naiwali na ang Pulong ug napamatud-an na sa taliwala nila, pero tungod sa pagkawalay-hibangkaagan milakaw ra sila palayo. Wala na gayu’y nahibilin pa kondili ang paghukom. Pero dili makatarunganon sa Dios—dili makatarunganon nga hukman ang usa ka nasud gawas kon nakadawat una kini’g kalooy adisir ang paghukom. Dios man Siya. Dili Niya buhaton ang ingon-niana.

76 Karon unsa ma'y atong masulti?

Kay kita nga . . . mingtoo usab nakasulod na niadto nga kapahulayan, ingon sa iyang gisulti, Sumala sa akong gipanumpa tungod sa akong kapungot, dili sila makasulod sa akong kapahulayan: bisan pa ang mga buhat nangahuman na sukad pa sa pagkatukod sa kalibutan.

Kay siya nag-ingon sa laing bahin mahitungod sa—mahitungod sa ikapito ka adlaw sa ingon niini, . . .

77 Karon, dili ko gusto nga makapasakit og pagbati sa mga tawo, tungod sa pagbatok sa ilang relihiyon. Dili kana mao'y akong tumong. Ngani dinha sa natad sa pagpangmision, ang ginawali lang nako mao ang regular, nga bantugang pang-ebanghelyo, og pundamental nga mga doktrina. Pero dinhi sa tabernakulo, sa taliwala sa akong mga anak dinhi, nabati ko nga aduna ko'y katungod nga iwali kung unsa ang sa hunahuna ko nga mao ang Doktrina ug Kamatuoran. Kita n'yo? Sa hunahuna ko husto ra kana.

78 Bueno, aduna ko'y linibo ka mga buutang higala nga mga Sabadista, nga mga kaigsoonang Seventh-day Adventist. Ang pipila sa pinakasuod kong mga higala, ang pipila kanila mga Seventh-day Adventist man.

Bisan, ang dakung kalihokan nga, gitawag, og—og *Voice of Prophecy*, hugot gayud ang pagsupak nila kanako. Ingon sila nga nagapamahayag kono ako sa pulpito, ug miingon kono ko nga, “Ako ang Dios. Ug nga—ug nga kining Kahayag nga nagasunod mao ang Manulonda, ug ako ang Dios. Ug mianhi ako sa kalibutan aron mamuhat og dagkung mga butang, aron pamatud-an sa mga tawo nga ako ang Dios.” Bueno, mao kana'y gisulti sa *Voice of Prophecy* mahitungod kanako, didto sa California. Ug si kinsa man ang nagsulti niana, kabalo mo, nga nagsulti gyud og dili tinuod.

79 Pero sa sugod pa lang, wala man ko'y gihunahuna nga batok sa iglesiang Seventh-day Adventist o sa unsa pa man nga iglesiang Sabadista, kondili alang lang gayud sa Ebanghelyo. Hisgotan nato, sa pipila ka minuto, ang bahin sa Pentecostal, usab. Oo. Tinuod. Ang bahin sa Baptist, maghisgot pud kita niana ug ipakita nga ang Dios wala gyu'y ginapaboran nga unsa mang denominasyon. Husto kana. Ang Iyang ginapaboran ang indibiduwal. Ug wala Siya nagapakighilambigit sa unsa mang denominasyon, wala Siya sukad-sukad nakighilambigit ug dili gayud Siya magapakighilambigit, sumala sa Iyang Pulong. Apan nagapakighilambigit Siya sa tagsa-tagsa nga anaa sa matag denominasyon. Oo, sa tagsa-tagsa man nagapakighilambigit ang Dios.

80 Karon paminawa n'yo kini nga klaro gayud, ug kon ugaling, sa unsa mang orasa, nga ipangutana kaninyo ang ingon-ani nga

pangutana, matubag gyud kini. Karon, hinaut nga tabangan kita sa Ginoo.

⁸¹ Karon, paminaw og ayo, “Kay . . .” Sa ika-4 nga bersekulo.

Kay siya nag-ingon sa laing bahin mahitungod sa ikapito ka adlaw sa ingon niini, . . .

⁸² Karon matikdi n’yo. Nagahisgot siya mahitungod sa sabbath. Pila man ang nasayod nga ang pulong nga *s-a-b-b-a-t-h* sa He- . . . ang Hebreohanong pulong nga nagakahulogan og “k-a-p-p-a-h-u-l-a-y-a-n”? Pila man ang nasayod niana, sa Ingles? Oo. Dili ba medyo talagsaon ang pulong nga *sabbath*? Mao gayud.

⁸³ Dili ba medyo talagsaon ang pulong nga *pagbalaan*? Ang *pagbalaan* usa kini ka Griyegong pulong. Ang *pagbalaan* nagakahulogan og “mamahimong balaan.” Sa Hebreohanon, nagakahulogan kini og “himoong balaan.” Sa Griyego, nagakahulogan kini og “pagbalaan.” Sa Ingles, nagakahulogan kini og “himoong limpyo.”

⁸⁴ Ang *sabbath* nagakahulogan og “adlaw sa kapahulayan.” Ingon niana ang daang sabbath kaniadto, usa ka adlaw sa kapahulayan. Pag mabasa ninyo ang *kapahulayan*, nagakahulogan kini og “sabbath.” Susiha n’yo kini diha sa inyong orihinal nga manuskrito, kung pananglitan aduna kamo’y Griyego nga Biblia, ug hibaloa n’yo mismo kung ang pulong . . . Kung aduna kamo’y Scofield nga Biblia, tan-awa ninyo ang gamay’ng sinulat nga pulong dinha sa daplin sa inyong Biblia mahitungod sa “kapahulayan” ug tan-awa kung dili ba kamo ginatudlo niana sa *sabbath*. Ang *sabbath* nagakahulogan og “kapahulayan.” Okey.

⁸⁵ Karon matikdi n’yo.

Busa mangahadlok kita, kay tingali unya, sanglit may saad nga gibilin alang kanato aron makasulod sa iyang sabbath, kapahulayan, . . .

⁸⁶ Karon, daghang mga tawo ang nagasaulog og mga adlaw, sama sa pagsaulog sa adlaw’ng igpapahulay nga *Sabado*. Ang uban sab ginasaulog ang *Dominggo* para sa dios-dios, ingon nga adlaw sa pagsimba. Ug pinaagi sa grasya sa Dios, ug pinaagi sa Pulong sa Dios, tabangan unta ako sa Dios karong gabhiona, nga mapamatud-an ko kaninyo nga pareho ra silang sayup. Ang magsisimba kada Dominggo ug ang nagasaulog sa sabbath, pareho ra silang bug-os gayud nga sayup sumala sa Pulong. Ug bisan pa, ang Pulong man gyud ang kinahanglan natong tumanon, dili sa kung unsa ang ginasulti sa mga Sabadista, o kung unsay ginasulti sa Protestante, o ang ginasulti man sa Katoliko. Kondili ang kung unsa ra ang ginasulti sa Biblia.

⁸⁷ Bueno, karon matikdi n’yo.

Kay siya nag-ingon sa usa ka bahin mahitungod sa ikapito ka adlaw sa ingon niini, . . .

Karon ipahimutang nato ang usa ka butang nga *ingon-niini*, ug tawgon kini—kining, “Kapahulayan sa Dios,” ang ikapito ka adlaw.

⁸⁸ Karon matikdi. “Ug ang Dios . . .” Paminawa n’yo karon kini nga Kasulatan.

. . . ang Dios mipahulay sa ikapito ka adlaw sa tanan niyang buluhaton.

Adunay Sabbath ang Dios, ug kana nga ikapito ka adlaw usa ka libo ka tuig ang gidugayon, nga maoy tipo sa Milenyum.

Kay siya nag-ingon . . . sa ikapito ka adlaw sa ingon niini, Ug ang Dios mipahulay . . . sa tanan niyang—niyang buluhaton.

Ang puli-ngalan nga, “Tanan *Niyang* mga buluhaton.” Mipahulay Siya sa ikapito ka adlaw. Ang Dios kadto.

Ug niining bahina (ilalum sa kasugoan), Dili sila magsulod sa akong kapahulayan.

⁸⁹ Mipahulay ang Dios, sa pisikal, kay gibuhat Niya ang mga langit ug yuta sulod sa unom ka adlaw, ug sa ikapito ka adlaw mipahulay Siya sa tanan Niyang buluhaton. Mipahulay Siya og usa ka libo ka tuig. Kay miingon ang Biblia, nga, “Ang usa ka adlaw sa yuta usa ka libo ka tuig sa Langit; ang usa ka libo ka tuig sa Langit usa ka adlaw sa yuta.” Pila man ang nasayod nga ginasulti kana sa Kasulatan diha sa Ikaduhang Pedro? Oo. “Ang Dios mipahulay sa ikapito ka adlaw. Ug sa usa ka bahin nagsulti Siya og ingon niini.”

⁹⁰ Karon paminaw mo og ayo.

Kay siya nag-ingon sa usa ka bahin mahitungod sa ikapito ka adlaw sa ingon niini, Ug ang Dios mipahulay . . . sa tanan niyang mga buluhaton.

Ug niining bahina usab, (ang kasugoan), Dili sila magsulod sa akong kapahulayan.

Iyang gihatagan ang mga Judio, og ikapitong-adlaw nga igpapahulay, sa ilang pagpaingon kaniadto gikan sa yutang saad, o, gikan sa Egipto paingon sa yutang saad.

⁹¹ Karon paminaw mo.

Busa sanglit aduna ma’y pipila nga kinahanglan mosulod didto, ug sila nga gikawalihan kanhi . . .

Ang kapahulayan! Gihatagan sila sa Dios og kasugoan, ug ang igpapahulay mao ang ikaupat nga sugo.

. . . wala makahimo sa pagsulod tungod sa pagkamasukihon: . . .

⁹² Karon matikdi n’yo. Nagahisgot siya mahitungod sa kasugoan, kung giunsa nila pagpakasulod, nga walay nahiuban nga pagtoo. Wala nila kadto natuman. Gisaulog ra nila ang

sabbath ingon nga handumanan, nga paingon na sila sa usa ka yutang sabbath, aron nga maangkon ang walay katapusan nga kapahulayan sa tanan nilang mga kalisdanan ug tanan nilang mga kabalaka, wala na'y mga tinugyanan sa buhat, ug wala na'y mga mahigwaos nga gabii. Paingon na sila ngadto sa gikasaad nga yutang kapahulayan. Nagapaagay kadto og gatas ug dugos. Ang mga ubas pa gyud dagku kaayo nga duha ka tawo ang nagpas-an sa usa ka pungpong niini diha sa ilang mga abaga. Oh, pagkamaanindot gayud niadto nga yuta sa mapanalanginong kapahulayan! Pero nangapakyas sila nga maangkon kadto sa dihang nakadangat na unta sila didto, tungod sa ilang pagkamasukihon. Mingtipas sila, diin kuwarenta ka milya na lang unta ang gilay-on gikan sa ilang pagbiya sa Egipto, paingon sa yutang saad. Ug mao nga miabot og kuwarenta ka tuig ang ilang pagpaingon didto, tungod sa ilang pagkamasukihon. Gihatagan sila sa Dios og ilang propeta, gihatag kaniya ang Iyang ilhanan, gihatag kaniya ang Haligi nga Kalayo, nagpakita og mga ilhanan ug mga katingalahan, ug giwali sàb ang Maayong Balita ngadto kanila. Pero ningtalikod sila, sa pagpangita og mga isda ug mga tinapay, ug nangapukan sila didto sa kamingawan. “Ug ang ilang mga lawas nangamatay didto sa kamingawan.”

93 Si Jesus, didto sa tuboran, Siya miingon.

Ingon sila, “Ang among mga ginikanan nanagpangaon man og manna didto sa kamingawan, sulod sa kuwarenta ka tuig.”

94 Siya miingon, “AKO MAO ang Tinapay sa Kinabuhi nga nagagikan sa Dios sa Langit. AKO MAO ang Tinapay sa Kinabuhi. Dili si Moises ang naghatag kaninyo niadto nga Tinapay. Ang Akong Amahan ang naghatag niadto nga Tinapay. Ug AKO MAO ang Tinapay nga nagagikan sa Dios sa Langit. Kung ang tawo mokaon Niini, siya dili gayud mamatay.” Mao kana ang kalahian.

95 Karon matikdi n'yo. Miingon sila nga Siya... “Nanagpanginom sila gikan sa Bato nga atua sa kamingawan, sulod sa *ingon ka gidugayon* nga mga tuig.”

96 Siya miingon, “AKO MAO kadtong Bato.” Dalaygon ang Iyang Balaan nga Ngalan! “AKO MAO kadtong Bato.”

Giunsa man pagkahimo nga Siya mao kadtong Bato? Kadto nga Bato usa man ka espirituwal nga Bato. Nagasunod Kadto sa mga anak sa Israel. Ug si Moises may dala nga usa ka sungkod sa iyang kamot, nga mao ang sungkod sa paghukom sa Dios. Ug gisultihan siya sa Dios nga bunalan ang Bato, ug gibunalan niya ang Bato. Ug sa pagbunalan niya, miagay ang mga tubig gikan sa maong Bato. Ug si Cristo kadto nga Bato, ug ang paghukom sa Dios nga bayad sa sala ang miigo Kaniya. “Gibutang sa Dios diha Kaniya ang kasal-anan natong tanan,” ug gidughang niadto nga kasal-anan ang Iyang kasingkasing. Ug

gikan sa Iyang kasingkasing midagayday ang Balaang Espiritu, nga sama sa kasapaan sa tubig, ngadto sa usa ka nagakamatay, naghimalatyon nga katawohan.

“AKO MAO kadtong Bato nga atua sa kamingawan.”

“Aba,” dunay miingon, “Buut Mo bang isulti kanako . . .”

⁹⁷ Miingon Siya, “Si Moises, kadtong nagsulti niana kaninyo, nangandoy gani siya nga makakita sa Akong adlaw. Ug nakita niya ang bahin niini.”

⁹⁸ Miingon kadto, “Karon, buut Mo bang isulti kanamo nga mas halangdon Ka pa kaysa kang Moises? Nga nakita Mo na si Moises? Ug walo ka gatus ka tuig na man nga namatay si Moises.” Ingon pa, “Kung nasayod kami nga aduna gyud diay Ka og yawa,” sa laing pagkasulti, buang-buang. “Nasayod kami nga Ikaw buang-buang.”

⁹⁹ Miingon Siya, “Sa wala pa si Abraham, MAO NA AKO. Ako mao ANG GAMHANANG AKO nga atua sa nagadilaab nga sapinit. Ako kadtong Kalayo nga atua sa nagadilaab nga sapinit. Ako kadtong Manulonda nga nagauna kanila.” Ug miingon Siya, “Gikan Ako sa Dios, ug mibalik Ako ngadto sa Dios.” Ug gikan Siya sa Dios, nahimong unod ug mipuyo ipon kanato; og mibalik ngadto sa mao ra nga Haliging Kalayo.

Ug ania Siya, karong gabhiona, human sa duha ka libo ka tuig, “ang mao sa gihapon kagahapon, karon, ug hangtud sa kahangturan,” nga ginabuhat ang mao gihapong butang, ginapangunahan ang Iyang mga gipanalanginang anak.

¹⁰⁰ Ug daghan ang wala nanagpakasulod . . . tungod sa pagkamasukihon. Bueno, ingon niya, “Nagtudlo Siya og usa ka adlaw,” usa ka adlaw kaniadtong nahuman ang Dios sa Iyang buluhaton. Dayon, “Nagtudlo Siya og ‘usa na usab ka adlaw,’ ug sa ingon niini, nga kung magpatalinghug sila, kung mangduol sila, nga nagasaulog sa mga sabbath, nagasunod sa mga bulan nga bag-ong subang ug mga ingon niana.” Dinha kamo ginapaningkamotang dalhon sa mga kaigsoonang Sabadista.

¹⁰¹ Karon padayon tà sa pagbasa. Matikdi n’yo.

Busa . . . nga may pipila nga kinahanglan mosulod didto, ug sila nga ginawalihan kanhi sa maayong balita wala makahimo sa pagsulod tungod sa pagkamasukihon.

¹⁰² Karon, sa ika-7 nga bersekulo. Oh, grabe! Masulti nako, nga ang Kasulatan dinihogan sumala sa matematika. Masulti nako, nga ang Kasulatan, sa tanang bahin, dinihogan gyud. Ang matematika sa Biblia hingpit gayud.

¹⁰³ Namatikdan ba ninyo nga ang Estados Unidos numero trese kini sa tanan nga ginabuhat niini? Nasayod ba mo nga natukod kini nga may trese ka mga kolonya? Nasayod ba mo nga may

trese ka bitoon ang bandila niini kaniadto? Nasayod ba mo nga ang tanang ginabuhat sa Estados Unidos anaa sa numero trese? Nasayod ba mo nga makita kini sa Biblia diha sa Pinadayag 13? Tinuod gayud. Ang gamay'ng mananap, ang cordero nga mihawas gikan sa tubig, dili sa mabagang panon sa mga tawo, . . . dili diay gikan sa tubig, kondili gikan sa yuta, kon diin wala pa kaniadto og tawo. Aduna kini'y duha ka gagmay'ng sungay: sibil ug pang-simbahan nga mga gahum. Ug usa siya ka cordero: may kagawasan sa relihiyon. Ug wala magdugay, nagkauban na sila ug misulti siya nga sama na sa dragon, ug gigamit ang tanang gahum nga gigamit kaniadto sa Roma nga nauna kaniya. Mahitabo kana sa atong nasud. Isulat n'yo kini. Bantayi ninyo ang paghiusa sa Konpederasyon sa mga Kaiglesiahan ug sa Katoliko, ug bantayi n'yo kung unsay mahitabo.

¹⁰⁴ Magkalisud gayud ang mga tawo nga nagasunod sa Haligi nga Kalayo, apan andam na man sila alang sa paglalin nianang higayona, husto kana, andam na gayud nga mobiya. “Kay gidaug sila sa Cordero,” ang ingon sa Biblia, “ug sila nga nagasunod Kaniya, tungod kay gitawag man sila nga mga pinili ug mga kasaligan, ang mga Pinili sa Dios.” Dili sa nato hisgotan karon ang mahitungod niana nga propesiya, aron makapadayon kita niini.

¹⁰⁵ Paminawa n'yo og ayo, ang ika-7 nga kapitulo, sa . . . ang buut kong ipasabot ang ika-4 nga kapitulo, sa ika-7 nga bersekulo. Ang pito mao ang numero sa pagka-kumpleto. Ang tulo mao ang numero sa Kinabuhi. Ang pito mao ang numero sa pagka-kumpleto, ug nagarepresentar kini sa kumpleto nga sabbath.

“Ug usab,” timan-i, namulong siya, “ang Dios,” sa ingon niini. Dayon namulong siya mahitungod sa “kasugoan,” sa ingon niini. Ug pagkahuman na, usab, “Nagtudlo Siya og usa ka adlaw,” ikatulo nga adlaw, ikatulo nga higayon.

Usab, siya nagtudlo og usa ka adlaw, usa ka adlaw, nagaingon pinaagi kang David, Karong adlaw, sa human sa hataas nga panahon; . . . Karong adlaw, sa human sa hataas nga panahon; bisan ingon sa gisulti niya kaniadto, Karong adlaw kung makadungog kamo sa iyang tingog, ayaw ninyo pagahia ang inyong kasingkasing. (Matikdi.)

. . . kung si Jesus mihatag pa kanila og kapahulayan (usa ka sabbath), . . . wala unta siya magsulti pagkahuman mahitungod sa lain pa nga adlaw.

Nausab man ang mga dispensasyon diha kang Jesus Cristo: gikan sa kasugoan paingon sa grasya, gikan sa mga buhat paingon sa grasya, gikan sa usa ka butang nga imong gibuhat paingon sa usa ka butang nga Dios ang nagbuhat, sa mga nabuhat ninyo o sa Iyang mga nabuhat. Nausab kini.

106 Sa dihang migula si Moises gikan sa kamingawan, nga dala ang kasugoan, miingon siya, “Dili ka manapaw. Dili ka mangawat. Dili ka magpatay. Ipapabilin nga balaan ang adlaw nga igpapahulay.” Sa dihang migula si Jesus gikan sa kamingawan. . . Sa dihang miadto si Moises, gitintal siya sa yawa. Sa dihang gitintal siya sa yawa, naminaw siya niadto. Aduna man gud og mahuyang nga bahin si Moises. Pila man ang nahibalo kung unsa kadto? Pagkamainiton sa ulo. Ug ngani sa dihang nakita niya sila nga nanagsimba niadtong imahe sa bulawan nga baka, gisalibay niya ang mga sugo ug nabuak kadto, nagapakita lang nga ang pagka-sacerdote pagabungkagon. Ug gihatagan siya niadto pag-usab sa Dios.

107 Apan sa dihang migula si Jesus gikan sa kamingawan, kuwarenta ka adlaw nga nagpuasa, gigutom Siya, nga mao ang bugtong mahuyang nga bahin nga aduna Siya. Ug miduol Kaniya ang yawa ug miingon, “Kung Ikaw ang Anak sa Dios, nan himoang tinapay kining mga bato. Pagbuhat og milagro dinhi. Ipakita kanako nga ginabuhat Mo kana, ug motoo ako Kanim.”

108 Ang ingon ni Jesus, “Nahisulat na, ‘Ang tawo mabuhi dili sa tinapay lamang, kondili sa matag Pulong nga nagagula sa baba sa Dios.’” Nasayod ang yawa nga dili si Moises ang iyang natagbo didto, tungod kay gibalikan man Niya ang Pulong.

109 Gidala Siya ngadto sa kinaibabwan, sa templo, ang ingon, “Kung Ikaw ang Anak sa Dios, nan ihulog ang Imong Kaugalingon.” Ug *gitaklapan*, dili gikutlo, kondili gitaklapan ang Kasulatan. Miingon, “Nahisulat na, ‘Siya magahatag og sugo sa mga Manulonda, mahitungod niini, kay tingali unya mahipangdol Mo ang Imong tiil sa bato. Pagasapnayon Ka Niya.’”

110 Ug si Jesus midiretso mismo sa Pulong, ug gibadlong siya.

111 Gidala na sàb Siya didto ibabaw sa bukid ug gipakita Kaniya ang Estados Unidos ug Germany ug Switzerland, ug ang tanang mga kanasuran sa kalibutan, nga magalungtad pa, miingon, “Sa akoa ang tanan niini. Ginahimo ko sa mga niini ang unsa man nga gustohon ko.” Dili ikatingala nga aduna kita’y mga gubat ug mga kasamok. Miingon, “Ginahimo ko sa mga niini. . .” Dili ikatingala nga ang mga kababayen-an nanagbisti’g. . . ug pasagdan ra nga makalusot niana, sa balaod. Silang tanan minandoan man gud sa yawa. Mao kana ang giingon sa Biblia. Miingon si Satanas, “Sa akoa ang mga niini. Ginahimo ko sa mga niini ang bisan unsa man nga gusto ko.” Ingon pa, “Kung Imo akong simbahon, himoon ko Ikaw nga hari sama kanako.”

112 Ang ingon ni Jesus, “Nahisulat na, ‘Magsimba ka sa Ginoo nga imong Dios, og mao lamang ang imong alagaran.’ Pahawa ka Kanako, Satanas.”

Ngano man? Nasayod man si Jesus nga pagapanundon Niya ang mga niini sa nianang mahimayaong Milenyum, pag moabot

na ang Iyang Gingharian. “Pagabuhaton ang Imong kabubut-on dinhi sa yuta maingon sa Langit.” Wala na didto’y mga pagsul-ob og purol. Wala na didto’y pag-inom og makahubog. Wala na’y pangibog. Wala na’y pagpanapaw. Wala na didto’y kamatayon. Wala na pu’y kasub-anan. Pagapanundon Niya ang matag nasud. Iyaha man ang mga niini. Husto kana. Iyaha ang mga niini, ug Siya ang magapanunod. Apan anaa pa ang mga niini kang Satanas sulod sa usa ka gidugayon sa panahon, nga mao kining panahon, nga atong gikapuy-an.

¹¹³ “Apan nagtudlo Siya og usa ka adlaw, nga nagaingon, ‘Karong adlaw, human sa hataas nga panahon.’ Ug miingon, ‘Ayaw ninyo pagahia ang inyong kasingkasing.’”

Kay kung si Jesus mihatag pa kanila og kapahulayan, . . .wala unta siya magsulti pagkahuman mahitungod sa lain pa nga adlaw.

¹¹⁴ Igsoon kong Adventista, tan-awa Kana. Gisulti ni Pablo, dinhi. Ug miingon si Pablo, sa Mga Taga-Galacia 1:8, kung ginasulat n’yo ang mga kasulatan, Mga Taga-Galacia 1:8, “Kung ang usa ka Manulonda nga gikan sa Langit moabot ug magawali og lain nga maayong balita gawas Niining ako nang gikawali, ipatunglo siya.” Ingon si Pablo, “Kung si Jesus mihatag pa kanila og usa ka adlaw sa Kapahulayan. . . .”

¹¹⁵ Matikdi n’yo, sa dihang minaug Siya sa bukid. Minaug na man Siya kaniadto. Nabuntog Niya ang yawa. Dinihogan Siya, og andam na alang sa Iyang ministerio. Miingon Siya, “Nadungog ninyo nga nagsulti sila, sila sa kaniadtong panahon, ‘Dili ka magpatay,’ apan ginasulti Ko kaninyo nga ang masuko sa iyang igsoon, sa walay hinungdan, nakapatay na. Nadungog ninyo nga nagsulti sila, sila sa kaniadtong panahon,” nga sa karong panahon, mao ang mga nagasaulog og sabbath. “Nadungog ninyo nga nagsulti sila, sa kaniadtong panahon, ilalum sa kasugoan, ‘Dili ka manapaw.’” Kinahanglan nga aktuwal gyud nga gibuhad, aron mamahimong sad-an. “Apan ginasulti Ko kaninyo, nga ang si kinsa man nga nagatan-aw sa usa ka babaye nga may pagkaibog kaniya nakapanapaw na uban kaniya sa iyang kasingkasing.” Lahi gayud! Gilagpasan mismo ang ikaupat nga sugo. Apan mihatag ba Siya kanila og Kapahulayan?

¹¹⁶ Tan-awon nato ang iyang gisulti. “Miingon si David, ‘Human sa hataas nga panahon, adunay magaabot nga usa ka hingpit nga Kapahulayan.’” Mipahulay ang Dios sa Iyang mga buluhaton, sa ikapito ka adlaw. Gipanalanginan sa Dios ang adlaw’ng igpapahulay, ug gihatag kini ngadto sa mga Judio didto sa kamingawan, sa ingon niini. Sila nanagpakasulod. . . tungod sa pagkamasukihon, tungod kay ang Pulong wala man pag-ubani og pagtoo. “Ug usab, nagtudlo Siya og usa ka adlaw,

nga nagaingon pinaagi kang David, ‘Human sa hataas nga panahon.’”

Gatasan ka mga tuig human nga namatay si David, motungha ang Anak ni David, nga mao si Jesus, “Ug kung makadungog sila sa Akong Tingog, ayaw ninyo pagahia ang inyong kasingkasing.” Magpakigsulti man gud ang Dios nganha sa kasingkasing.

117 Karon matikdi n’yo, sa ika-9 nga bersekulo karon, para sa inyo nga mga nagabasa. “Kon si Jesus mihatag pa kanila og kapahulayan,” sa ika-8 nga berskulo, “Siya wala unta . . . magsulti mahitungod sa lain pa nga adlaw.”

118 Kung aduna ma’y usa ka sabbath, kung aduna man og usa ka pagsaulog og Dominggo, nan nagsulti na unta Siya mahitungod niini. Kung miingon man Siya, “Karon wala na’y sabbath, wala na’y pagsaulog sa ikapito nga adlaw, ang gusto Ko nga saulogon ninyo mao ang Dominggo,” nagsulti na unta Siya niini. Miingon si Pablo nga nagsulti na unta Siya. Siya nagsulti na unta, “Managsimba kamong tanan sa Dominggo. Mao kana ang kapahulayan.” Bueno, kung gigusto pud Niya nga saulogon nila ang sabbath, nan nagsulti na unta Siya, “Ipadayon lang ninyo nga saulogon ang ikapito nga adlaw. Pero sa karon gusto Ko nga saulogon pud ninyo ang Dominggo, ang ikawalo nga adlaw.” Wala. Wala gayud Siya nagsulti niana.

119 Ingon niya, “Kung si Jesus mihatag pa kanila og usa ka adlaw, dili ba Niya isulti ang mahitungod niini?”

120 Karon sa ika-9 nga bersekulo. Pangandam mo.

Busa nagapabilin pa diay ang usa ka kapahulayan alang sa mga tawo sa Dios, usa ka pagsaulog-og-sabbath alang sa mga tawo sa Dios.

Kay siya nga nakasulod sa iyang (kang Cristo) kapahulayan, miundang man usab sa iyang mga pagpamuhat, maingon nga miundang niadto ang Dios sa iyang mga pagpamuhat, sa sabbath.

121 Nakita n’yo na? Karon maghisgot pa kita og pipila ka Kasulatan ug pamatud-an kini. Sige. Sa dihang gibuhat sa Dios ang kalibutan sulod sa unom ka adlaw, mipahulay Siya sa ikapitong adlaw, ug wala na magbuhat pa. Dalaygon ang Ngalan sa Ginoo. Gitukod Niya ang kalibutan, gipahimutang ang mga linalang sa ibabaw niini, ug mipahulay na; ug wala na mibalik pag-usab, aron magbuhat og uban pa nga kalibutan. Gitapos Niya ang maong mga buluhaton, ug mipahulay na. Karon, sa . . . Dayon, pagkahuman niadtong usa ka libo ka tuig, misulod na dayon ang sala; dayon girepresentar si Cristo, girepresentar Siya sa Cordero. Bueno, gihatag kini sa mga Judio ingon nga tipo sa ikapitong-adlaw nga Kapahulayan.

Karon, *siya* nagtudlo og usa pa *ka adlaw, nagaingon pinaagi kang David, . . . human sa hataas nga panahon, adunay* magaabot nga usa pa ka kapahulayan.

¹²² Karon unsa man kana nga Kapahulayan? Pagpakli kamo uban kanako sa Mateo, sa ika-11 nga kapitulo, ug sa ulahing bahin sa ika-11 nga kapitulo sa San Mateo. Dinha kon diin gitapos ni Jesus ang Iyang wali sa bukid, ug makita ninyo kung unsa ang giingon Niya.

¹²³ Miingon Siya, “Ang si kinsa man nga nagatan-aw sa usa ka babaye, nga may pagkaibog kaniya, nakapanapaw na uban kaniya sa iyang kasingkasing. Ang masuko sa iyang igsoon, sa walay hinungdan, gipatay na niya ang iyang igsoon.” Tanan niining mga butanga, pero wala Niya gihisgotan ang ikaupat nga sugo, kanang sabbath.

¹²⁴ Patapos na Siya kaniadto. Ug ang Sabbath mao ang mahimayaong Saad sa Dios. Usa kini ka Kapahulayan. Bueno, karon matikdi n’yo dinhi, kaniadtong nahuman na Siya sa mga kabulahanan. Nagaingon Siya dinhi, sa ika-27 nga bersekulo sa ika-11 nga kapitulo sa San Mateo. Diin, ginatudlo Niya ang mga kabulahanan diha sa ika-5 nga kapitulo.

Ang tanang mga butang gitugyan sa akong kamot, nganhi kanako sa akong Amahan: ug walay nakaila sa Anak, gawas sa Amahan; . . .

Kita n’yo, dili ninyo maila ang usa nga wala ginaila ang usa pa, tungod kay Siya man ang Amahan nga nadayag diha sa unod.

. . . walay bisan kinsa nga nakaila sa Amahan, gawas sa Anak, . . .

¹²⁵ Mora’g makita na man gyud Kana sa mga tawo ug dili na makiglantugi pa. Mao gayud. Ang Dios dili tulo ka Indibiduwal. Kung Siya ma’y tulo ka Dios, nan mga pagano na kita kung ingon-ana. Si kinsa man diay kanila ang Dios? Silang, tulo, usa ra ka Dios, ang tulo ka opisina sa mao ra nga Dios. Siya mao ang Amahan, sa porma nga Balaang Espiritu, og kadtong Haligi nga Kalayo didto sa kamingawan. Siya mao ang Anak, kaniadtong gigamit Niya ang opisina sa pagka-Anak. “Sa diriyut lamang panahon ug ang kalibutan dili na makakita Kanako; molakaw Ako. Mobalik Ako pag-usab ug magauban kaninyo, bisan sa sulod ninyo, hangtud sa katapusan sa kalibutan.” Kita n’yo? Siya mao ang pagka-Amahan, ang pagka-Anak, ug ang Espiritu Santo, usab. Kining tanan ang mao ra mismo nga Dios nga nagapamuhat diha sa tulo ka managlahi nga opisina: pagka-Amahan, pagka-Anak, Espiritu Santo. Dili gayud. . .

Ang ingon sa Unang Juan 5:7, “Adunay tulo nga nagapamatuod sa Langit: ang Amahan, Anak, Espiritu Santo. Kining tulo Usa ra.”

126 Miingon si Tomas ngadto Kaniya, “Ginoo, ipakita kanamo ang Amahan.” Igo na kono kadto sa iyaha.

127 Miingon Siya, “Dugay na Akong ania uban kaninyo, ug wala pa ba ikaw makaila Kanako?” Ingon pa, “Kon nakita n’yo Ako, nakita n’yo na ang Amahan. Ug nganong moingon man mo, ‘Ipakita kanamo ang Amahan?’”

128 Karon, kana baya ang gigamit sa Oneness, sa grupo sa mga oneness, ug gapaninguha nga himoon ang Amahan, Anak, ug Espiritu Santo, nga usa lamang ka opisina ug usa ra ka bahin, ug sama sa inyong tudlo, nga usa. Sayup kana. Ang Dios dili mahimong. . . si Jesus dili man mamahimo nga Iyang Kaugalingong amahan. Kung Siya man, nan Siya’y usa ka. . . Bueno, unsaon man Niya pagkahimong Iyang Kaugalingong amahan?

129 Ug kung usa ka tawo ang Dios, nga lahi sa Espiritu Santo, nan aduna diay Siya’y duha ka amahan. Kay miingon man ang Biblia, nga, “Gilandongan sa Balaang Espiritu si Maria ug nanamkon siya.” Ug miingon pud ang Biblia, sa Mateo 1:18, nga, “ang maong butang nga gisamkon niya mao’y iya sa Espiritu Santo.” Kung ingon-ana kinsa man ang Iyang amahan, ang Espiritu Santo ba o ang Dios? Pareho, ang mao ra nga Espiritu, kay kon dili nan ilehitimo diay ang Iyang pagkahimugso tungod sa duha ka espiritu.

Ngani usa kana ka dogma sa Katoliko, ug dili gayud kana usa ka pagtudlo sa Biblia. Gidala kana ni Martin Luther, lakip ang tanang uban pa nga Katolisismo nga anaa sa iglesiang Lutheran. Misunod pud niana si Wesley. Ug hangtud karon nagapadayon gihapon kana, apan sayud gyud kana. Dili kana mao ang Kamatuoran. Dili kana, dili gayud kana Doktrina sa Biblia. Dili sàb kana sugo diha sa Biblia, ang pagtudlo og tulo ka Dios.

Adunay usa ra ka Dios. Miingon si Jesus, “Magpatalinghug ka, Oh Israel, Ako ang Ginoo nga inyong Dios, usa ra nga Dios,” dili nga tulo ka Dios.

130 Didto sa Africa, nagabautismo sila sa makausa para sa Amahan, sa makausa para sa Anak, ug sa makausa na pud para sa Espiritu Santo. Ug busa moduol ang luoy’ng Judio, moingon, “Si kinsa man kanila ang inyong Dios? Si kinsa man kanila, ang Amahan ba, ang Anak, o Espiritu Santo?” Silang, tulo, Usa ra. Ang Biblia miingon nga sila’y Usa ra.

131 Si Jesus mao ang usa ka balay nga gipuy-an sa Dios. Ang Biblia ang nagsulti niana—niana, Unang Timoteo 3:16, “Dili *malalis*,” (ingnon tà nga, “panaglantugi”) “daku ang tinago sa pagkadiosnon. Kay ang Dios nadayag diha sa unod, nakita sa mga Manulonda, gidawat sa. . . giwali, gitoohan, ug gibayaw ngadto sa Himaya.” Mao kana ang Dios. Miingon ang Biblia, “Ang Iyang Ngalan pagatawgon *Emmanuel*, nga ang kahulogan

mao kini, ‘Ang Dios uban kanato.’” Miingon ang Biblia, nga, “Si Jesus, diha Kaniya nagapuyo sa pagkalawas ang bug-os kinatibuk-an sa pagka-Dios.”

¹³² Sumala sa atong gihisgotan niadtong miaging gabii: ang Dios, sa sinugdanan, Espiritu. Ug dayon, gikan sa Dios, migula ang Logos, o ang theophany, nga porma sa usa ka tawo, nga gitawag og Anak sa Dios, nga gihulagway nang daan. Mianhi Siya sa yuta, diha sa lawas nga unod, bisan kaniadtong wala pa Siya mianhi ingon nga si Jesus Cristo. Karon tunla n’yo lang sa’ kana sa makausa, igsoon. Pamatud-an ko kini kaninyo.

¹³³ Kaniadtong—kaniadtong nakita Siya ni Moises. Ingon niya, “Ipakita kanako ang Imong porma, Ginoo.” Ug gipatago siya sa Dios didto sa bato. Ug sa paglabay Niya, ingon si Moises, “Likod nga bahin kadto sa usa ka tawo.” Kadto mao ang Theophany. Eksakto gayud.

Dayon, gikinahanglan nga mahimong unod kadto nga Theophany. Dili nga usa na usab ka Persona, kondili ang mao ra mismo nga Persona ang gikinahanglan nga mahimong unod, aron wagtangon ang ikot gikan sa kamatayon.

Sama sa usa ka buyog pag nakapamaak na kini, mabilin na ang ikot niini. Ug wala niini nabilin kadtong. . . Mahimo niini nga mapataup ang ikot diha sa tawhanong unod tungod kay sala man kini. Apan, igsoon, kaniadtong gipaak niini ang unod ni Emanuel, nawagtang ang ikot niini. Oo, sir. Mahimo kining mohagyong-hagyong pero wala na gyud kini’y ikot.

¹³⁴ Dili ikatingala, si Pablo, kaniadtong punggoton na nila ang iyang ulo, miingon pa, “Oh kamatayon, hain na ang imong ikot? Mahimo mong mohagonghong ug mohagyong-hagyong kutob sa gusto mo. Lubnganan, hain na ang imong pagdaug? Apan salamat sa Dios nga naghatag kanato og pagdaug pinaagi ni Jesus Cristo.” Mao kana.

Gikinahanglan nga ang Dios Mismo ang mobuhat niadto. Mao nga mianhi Siya ug nadayag sa unod. Mibalik Siya pag-usab sa Espiritu.

¹³⁵ Moingon mo, “Igsoong Branham, wala mo pa gisulti kanamo, hangtud karon, kon kanus-a nahimong unod ang Dios sa wala pa Siya mianhi ingon nga si Cristo.”

Sa dihang atua si Abraham sa iyang balongbalong, usa niadto ka adlaw, dihay miabot nga duha ka Manulonda ug ang Dios, nga miduaw ngadto kaniya, diha sa tawhanong unod, nalukop og abog ang Ilang mga bisti ug mga gipangkapoy, ug nanglingkod Sila. Ug migawas si Abraham ug mikuha og nating baka gikan sa kabakahan, ug gipaihaw kadto. Ug nagpaluto og pipila ka hiniwa nga karne sa karnero. Migawas ug mikuha. . . gipakuha si Sarah og pipila ka harina nga mais ug gipasala kadto, ug gipaluto og pipila ka tinapay. Ug nagpahimo og mantekilya nga gikan sa gatas sa baka, ug nagpakuha pud og

gatas. Ug gidala na kadto sa gawas ug gibayang kadto, ug gikaon kadto sa Dios.

136 Alleluyah! Mao kana'y hinungdan, "Ang akong pagtoo nakasentro Kanimo, Ikaw nga Cordero sa Kalbaryo."

137 Sa hunahuna n'yo ba malisud kana nga butang para sa Dios? Ang Dios, Nga naghimo sa tanang potash ug mga calcium, ug sa tanan-tanan nganhi sa kalibutan, mikanaug Siya aron duawon si Abraham. Miingon Siya, "Nagahunahuna ka ba nga ililong Ko kini kanimo, ingon nga nakita Ko nga ikaw mao ang manununod sa kalibutan?" Amen. "Dili Ko kini ililong kanimo." Ang Dios aduna gayu'y . . .

138 Naglangkob kita og dise-sais ka mga elemento. Igo lang Siya nga mikuha og pipila ka potash, ug pipila ka calcium, pipila ka petrolyo, cosmic light, ug "Whew!" "Sumulod ka dinha, Gabriel," usa na dayon ka lawas!

139 "Whew!" "Sumulod ka dinha, Wormwood." Misulod siya didto.

Duha ka Manulonda, gikan sa Langit!

140 Mituyhod lang ang Dios ug mikuha og pipila niini, "Whew," misulod niadto, Siya Mismo. Mikanaug, ug gigutom. Mapanalanginon. . . Unsa man kana, mga igsoong Adventista nga dili mokaon og karne? Moabot ra kita dinha, pagkataudtaud. Ang Dios nga Makagagahum-sa-tanan, si Jehovah, hibaloa n'yo kung kanang mao ra nga Ngalan dili ba pareho ang pagkahubad niadtong Mao sa gihapon nga atua sa nagadilaab nga sapinit! Alleluyah!

Ug kaniadtong ania pa Siya sa yuta, miingon Siya, "Sa wala pa si Abraham, MAO NA AKO, kadtong Mao sa gihapon nga atua sa nagadilaab nga sapinit." Husto kana, si Elohim, tan-awa n'yo kung dili ba kana mao sa gihapon. Siya Mao gyud kadtong atua sa nagadilaab nga sapinit.

141 Siya Mao sàb kadtong atua sa atubangan ni Abraham, nga anaa sa usa ka lawas nga unod, nga mikaon og karne sa nating baka, ug miinom og gatas gikan sa baka, ug mikaon og mantekilya nga anaa sa tinapay. Dalaygon ang Balaan nga Ngalan sa Dios! Miduol mismo didto ug miingon, "Dili Ako mobiya. . ."

Ug nakatalikod Siya kaniadto. Miingon Siya, "Abraham, pagaduawon Ko ikaw, ug makabaton ka og anak. Usa ka gatus anyos na ang imong panuigon, ug si Sarah nubenta na." Ug si Sarah, nga anaa sulod sa balongbalong, naka, "Ha!" nakatawa. Miingon Siya, "Nganong mikatawa man si Sarah?" Sa luyo Niya; anaa man sa tunga-tunga nila ang balongbalong.

142 Miingon si Abraham, "Sarah, mikatawa ka ba?"

143 "Wala, wala man."

144 Miingon, “Oo, mikatawa ka baya.” Unsa man kana nga matang sa telepatiya? Unsa man kadto nga matang sa pagbasa sa hunahuna?

Mao man sa gihapon ang Iyang ginabuhat sa karong panahon. Siya mao si Jehovah-jireh, si Jehovah-rapha, mao sa gihapon kagahapon, karon, ug hangtud sa kahangturan. Wala gayud Siya nagakapakyas.

145 Matikdi n’yo Siya. Atua Siya nagatindog. Milakaw paadto didto ug nakig-istorya kang Abraham; ug nawala ra dayon, sa atubangan ni Abraham. Ug miingon ang halangdon nga patriarkang si Abraham nga iyang “naistorya sa nawong og nawong ang Dios, si Elohim,” ang mao ra nga Dios. Nasabtan n’yo ba? Dili tulo ka Indibiduwal, igsoon. Kondili tulo ka opisina sa mao ra nga Persona!

146 Mao ra gihapon sa sinugdanan, Siya mao kadtong gamhanang Espiritung, Tuboran kon diin ang tanang kamatuoran, ang tanang gugma, ang tanang pakigdait. Ang tanan-tanan nga putli anaa niini nga Tuboran. Misugod kining nagporma og usa ka lawas, usa ka theophany, ang matang sa lawas nga atong padulngan. Dili nga usa ka gihimaya nga lawas, kondili usa ka langitnong lawas, nga; may hitsura, og porma.

147 Sa matag higayon nga makakita ako og usa ka kahoy, mahunahuna ko, “Kana nga kahoy mao ang negatibo. Aduna gyu’y positibo sa kon asa man.” Tungod ang maong kahoy gihimo man gikan sa usa ka butang. Usa ka kaalam ang naghimo niana. Ug ang ginabuhat lang niining kalibutana mao ang ireplektar ang anaa sa Langit. Mao kana’y giingon sa Biblia. Ug kung adunay usa ka kahoy dinhi nga nagakamatay, nan aduna gyud didto’y usa sa Himaya ang dili na mamatay.

148 Kung makakita pud ako og usa ka lalaki, makakita ako og matahum nga batan-ong magtiayon, ang lalaki ug iyang asawa, nga nagalakaw sa kalsada, ingon nga magtiayon nga magkauban, unsa ma’y ginareplektar niana? Dalaygon ang Ngalan sa Ginoo! Adunay usa didto sa Langit nga dili gayud mamatay. “Kung kining yutan-on nga tabernakulo matun-as man, aduna na kita’y usa nga nagahulat,” ang theophany.

149 Dayon masabtan n’yo na ang trinidad: ang gamhanang Espiritu, nga nagapuyo sa Anak, kang Jesus; si Jesus usab nga nagapuyo sa Iglesia. “Niadto unyang adlaw, kamo makaila nga Ako anaa sa Amahan, ang Amahan ania Kanako, ug Ako anaa kaninyo.” [Blangko nga bahin sa teyp—Ed.] Ang tanan sa kung unsa ang Dios, gibubo Niya ngadto kang Jesus; ang tanan sa kung unsa si Jesus, gibubo Niya ngadto sa Iglesia. Mao kana. “Ako anaa sa Amahan, ang Amahan ania Kanako; Ako anaa kaninyo, ug kamo ania Kanako.” Mao kana—mao kana ang Lawas.

150 Mao kana'y problema sa iglesia. Gikatudloan sila og walay hinungdan, binayot, karaang binabaye nga matang sa doktrina, nagabagdoy-bagdoy ra ug nagapahigayon og mga soup supper ug mga party-party sa pagdula og baraha. Dili ikatingala nga daghang kagubot ang ania kanato. Wala kita nagkinahanglan og mga programang pang-bata ug mga soup supper. Ang gikinahanglan nato mao ang malig-on nga karaang Ebanghelyo, ug mga kalalaken-an sa pagtoo nga may espada nga ginawarawara, ug nagapanghagit. Ang gikinahanglan nato sa karon, dili ang kung unsa mang walay-hinungdan nga teolohiya ug kung unsa mang teorya nga hinimo sa grupo sa tawo. Ang gikinahanglan nato mao ang malig-on nga Ebanghelyo nga ginawali diha sa Kahayag ug sa Gahum ug pagpadayag sa Espiritu Santo.

151 Matikdi n'yo dinhi karon.

Sumala sa iyang gisulti, *siya* nagtudlo og usa pa *ka adlaw*, nga *nagaingon pinaagi kang David*, . . .

. . . *kung si Jesus mihatag pa kanila og kapahulayan*, . . . *wala unta siya*. . . *magsulti mahitungod sa lain pa nga adlaw*.

Apan nagapabilin pa diay. . . *ang usa ka kapahulayan alang sa mga tawo sa Dios*.

Kay siya nga nakasulod na sa iyang kapahulayan, . . . *miundang man sa iyang mga pagpamuhat, maingon nga miundang niadto ang Dios sa iyang mga pagpamuhat*.

152 Karon asa na man ta magabasa? Mateo, sa baynte- . . . Sa ika-11 nga kapitulo, ika-27 nga bersekulo.

Ang tanang mga butang nga gitugyan sa Amahan nganhi kanako, gitugyan kanako sa akong Amahan, diay: ug walay nakaila sa Anak, gawas sa Amahan; (Oo.) walay bisan kinsa nga nakaila sa Amahan, gawas sa Anak, ug kaniya kang kinsa igakahimuot sa Anak ang pagpadayag sa amahan.

153 Kita n'yo, kini'y dili sa kung unsa pa ka daghan ang inyong nakat-onan, sa kung unsa pa ka daghan ang—ang gusto sa obispo nga mahibaloan ninyo. Kini mao'y kung unsa gayud ka daghan ang gusto sa Dios nga mahibaloan ninyo. Kung dili ninyo makita kini nga Kapadayagan, ayaw pangayoa sa obispo. Pangayoon n'yo sa Dios. Ayaw n'yo pangayoa sa inyong pastor. Pangayoa n'yo sa Dios. “Ginapadayag Siya sa Anak,” *Siya*, puli-ngalan.

154 Paminaw mo. Makapakurat gyud kini sa inyo. Ania ang sugo. Ang ingon ni Pablo, “Kung Siya nagbilin pa og lain nga adlaw, nagsulti na unta Siya mahitungod niini.” Apan ania ang gisulti Niya.

Umari kanako, kamong tanan nga gikapoyan ug nabug-atan, ug hatagan ko kamo og sabbath, kapahulayan.

Isangon ninyo ang akong yugo diha kaninyo, ug magtoon kamo kanako; kay ako maaghop ug mapainubsanon sa kasingkasing: ug makakaplag kamo og sabbath alang sa inyong kalag.

Kay ang akong yugo masayon, ug magaan ang akong mga luwan.

155 Matikdi n'yo ang gisulti ni Pablo.

...kung si Jesus mihatag pa kanila og kapahulayan, ...siya nagsulti na unta mahitungod sa lain pa nga adlaw.

Apan siya nagtudlo og usa ka...adlaw, nagaingon pinaagi kang David, ...human sa hataas nga panahon;...kon kamo makadungog sa iyang tingog, ayaw ninyo pagahia ang inyong kasingkasing.

“Ug nagapabilin pa...” Karon paminawa n'yo, ika-9 nga bersekulo.

Busa nagapabilin pa diay ang usa ka kapahulayan, usa ka sabbath, alang sa mga tawo sa Dios.

Kay siya, ang lalaki o babaye, nga nakasulod na sa iyang kapahulayan...

“Umari kamo Kanako, kamong tanan nga gikapoyan ug nabug-atan, papahulayan Ko kamo.”

...nga miundang man sa iyang...mga pagpamuhat, maingon nga miundang niadto ang Dios sa iyang mga pagpamuhat.

156 Tingali'g baynte anyos ka na. Tingali'g traynta anyos ka na. Tingali'g singkwenta anyos ka na. Apan sa higayon nga madungog mo ang Tingog sa Dios nga nagapanuktok sa imong kasingkasing, ayaw kini pagahia. Dayon sumulod... “Ang nagapatalinghug sa Akong mga Pulong, og nagatoo Kaniya nga nagsugo Kanako, adunay walay katapusang, Kinabuhing Eternal, ug dili na pagahukman sa silot kondili miagi na gikan sa kamatayan ngadto sa Kinabuhi.”

157 “Unya, Igsoong Branham, unsa na ma'y mahitabo?” Madawat ninyo ang Espiritu Santo. Mosulod kaninyo si Cristo. Husto ba?

158 Pagpakli mo uban kanako sa Isaias, sa ika-28 nga kapitulo, ug basahon nato. Isaias, sa ika-28 nga kapitulo, tan-awa n'yo kung unsa ang giingon sa propeta mahitungod niini. Mateo... 28, sugdan ta sa ika-8 nga bersekulo. Ania ang malisud nga kahintang sa kaulahiang mga adlaw. Kinahanglan na natong humanon sa dili madugay.

Kay ang tanan nga mga lamesa mangapuno, nga nangapuno sa sinuka ug...wala na'y dapit nga malimpyo.

¹⁵⁹ Mohunong úsa ako sa makadiyut. Sama sa gisulti ni Ernie niadtong miaging gabii, aduna kono siya'y gikaistorya. Si Ernie Fandler, kining igsoon dinhi nga taga Switzerland, ingon siya, "Mihunong sa ako ug gipatuhop kadto."

¹⁶⁰ Gusto ko nga motuhop kini.

...wala na'y dapit nga malimpyo.

Kay ang tanan nga mga lamesa mangapuno sa sinuka...

Ug sama sa usa ka iro nga nagabalik sa *suka niini*... ug ang usa ka *baboy*...ngadto sa *iyang* lunangan, mao man usab ang mga tawo nga nanagpamalik.

¹⁶¹ Unsa ma'y nahitabo kaninyong mga Methodist? Aduna man unta kamo og Kahayag kaniadto. Pero unsa ma'y nahitabo? Gikuha Kini sa Dios gikan sa inyo, og gihatag Niya Kini ngadto sa mga Nazarene.

Unsa ma'y nahitabo kaninyong mga Nazarene? Naangkon na ninyo kaniadto ang Kahayag. Pero gikuha Kini sa Dios gikan sa inyo ug gihatag Kini ngadto sa mga Pentecostal. Husto. Kamong mga church of God ug ang tanang uban pa sa inyo nga mga tawong holiness, tungod kay inyong gisalikway ang Kahayag, nahimo kamong denominasyon ug miingon, "Wala na kami'y toohan nga labaw pa *niini*," mao nga migawas ang Dios ug gipakita kaninyo nga aduna Siya'y katawohan nga mosunod gyud Kaniya.

¹⁶² Unsa ma'y nahitabo kaninyong mga Pentecostal? Naangkon n'yo na kaniadto ang Kahayag. Pero gikuha Kini sa Dios gikan sa inyo.

Nagapadayon gihapon ang Haligi nga Kalayo. Sa matag higayon nga mopadayon ang Haligi nga Kalayo, mopadayon pud ang Iglesia uban Niini.

Ug sa diha nga nahimong organisasyon si Luther, gawas sa iglesiang Katoliko, og kaugalingon na niyang iglesia, mihawa ang Haligi nga Kalayo ug misunod Niini si Wesley.

Nag-organisa si Wesley ug naghimo'g iyang denominasyon, ug mibalhin na usab ang Haligi nga Kalayo ug misunod Niini ang mga Nazarene.

Nag-organisa pud ang mga Nazarene, ug misunod Niini ang church of God; ug miingon nga dili kono sila usa ka denominasyon, pero mao gayud sila.

¹⁶³ Dayon unsa na ma'y nahitabo? Ang sunod nga nahitabo, nakita sa mga Pentecostal ang Kalayo, ug nanggawas sila. Ug unsa ma'y gibuhat ninyo? Naghimo og usa ka doktrina

gumikan sa pagsulti og laing mga pinulongan, ug giorganisa kini, “Ang tanan kinahanglan gyud nga makasulti una og laing mga pinulongan adisir nila maangkon ang Espiritu Santo,” mao nga mipalayo ang Dios ug gibiyaan kamo sa kon asa kamo nahimutang.

¹⁶⁴ Unsa ma’y nahitabo kaninyong mga Oneness? Nasayran n’yo ang bautismo, sa Ngalan ni Jesus. Pero naghimo gihapon kamo og usa ka doktrina gikan niini, ug gihimulag ang inyong kaugalingon gikan sa tanang uban pa Niini, ug mipalayo dayon ang Dios ug gibiyaan kamo dinha. Oo.

¹⁶⁵ Unsa ma’y nahitabo kaninyong mga Assembly of God, ang karaang Pangkinatibuk-ang Konseho? Naghimo pud kamo og inyo mismong organisasyon, ug mipalayo dayon ang Dios ug gibiyaan kamo dinha. Ug karon kamo wala na’y lain kondili usa ka mabugnaw, og pormal nga pundok sama sa uban pa kanila.

Ug nagpadayon ra ang Haligi nga Kalayo. Alleлуйah!

...ang tanan nga mga lamesa nangapuno sa sinuka...

¹⁶⁶ Matikdi n’yo ang Panihapon sa Ginoo. Aba, ang ilaha ganing... atua ako niadto sa usa ka lugar diin ordinaryo ra nga tinapay ang ilang ginagamit. Nga unta tinapay man nga walay lewadura ang angay pagagamiton. Ug ila kadtong gipang-apod-apod sa mga makasasala, sa mga tigpanigarilyo, mga bigaon, mga dautang babaye, basta lang nga nakalista ang ilang ngalan diha sa libro.

¹⁶⁷ Ug kamong mga Baptist ang tawag n’yo gani niini “eksklusibo” nga komunyon. Karon, kamong mga Baptist medyo mangandak pa, pagatangtangan sa Dios ang inyong mga pagpangandak. Eksakto gayud, og dili na kamo makapangandak pa. “Eksklusibo” nga komunyon, ginapahimulag n’yo ang inyong kaugalingon, nga daw sa mas balaan kamo kay sa uban.

Hinumdumi, usa kini ka tabernakulo sa Baptist. Mao gyud kana ang inyong madangatan, tungod nga nagaorganisa kamo mismo. “Oh,” moingon mo, “dili man kami usa ka organisasyon.” Oo, organisasyon man mo. Tinuod bitaw, mao gyud kamo. Moingon mo, “Kami’y usa ra man ka pagpakig-fellowship.” Oo, si kinsa man nga mosulod sa pultahan ug magtudlo pud sa kung unsa mismo ang inyong ginatoohan, okey ra. Apan, kung dili, dili n’yo—n’yo man pud siya paundangon dayon, pero palagputon ninyo siya gikan sa inyong asosasyon. Eksakto gyud kana. Oh, aduna kamo’y paagi sa pagbuhat niana. Aduna man usab ang Dios og paagi sa pagpamuhat. Mao nga magapadayon gayud ang Iglesia sa Dios. Tungod dili man kana mapahanugotan sa Haligi nga Kalayo.

...ang tanan nga mga lamesa nangapuno sa sinuka...

168 Karon paminaw mo. Karon makapakurat gyud kini kaninyo sa makadiyut. Paminaw. Basahon ko ang Pulong. Kinsa man kini? Ang propeta, Isaias.

...ang tanan nga mga lamesa nangapuno sa sinuka...hangtud nga wala na'y unsa man nga malimpyo, puro gayud iro nga nagakaon sa sinuka sa iro.

169 Mangadto sa simbahan: mga kababayan-an nga nanagpapatol og buhok, mugbo ang ilang buhok, nanagsul-ob og purol, unya manggawas pa gyud ug pagmakita ang nagalakaw nga mga kalalaken-an didto sa dalan; manghagbas kono sila og sagbot diha sa nataran, pero gusto lang gyud sa maong mga babaye nga makadungog nga adunay managhoy kanila og malaw-ay nga pagtaghoy, o unsa man kana, kabalo na mo, “Whet-whew!” Oh, abi n’yo nga maanyag kamo, tungod niana?

170 Ug kamong mga kalalaken-an nga nagalakaw diha sa dalan, nga may sigarilyo diha sa inyong baba, ug miyembro pa gyud sa hunta sa mga diyakono. Mora hinoon kamo og toro nga Texas nga gitanggalan og mga sungay. Ug dayon maghunahuna mo nga mora na kamo’g si kinsa. Eksakto gayud. Dili ikatingala nga ang tanang mga lamesa . . . moduol didto ug moambit sa komunyong, ug manglihok nga mora’g si kinsa, pero nagapanglimbong ug nagapangawat ug nagapamakak gihapon, sa tibuok semana. Unsa na ma’y nahitabo kaninyo?

...ang tanan nga mga lamesa nangapuno sa sinuka...

171 “Oh, nagaambit man ako sa Panihapon sa Ginoo. Oo, ginabuhat man namo kana sa among simbahan. Miingon si Jesus nga pagabanhawon Niya kami sa kaulahiing mga adlaw kung moambit kami sa Panihapon sa Ginoo.”

172 Apan, “Ang mokaon ug moinom nga dili-takus, nagakaon ug nagainom siya sa hukom sa silot alang sa iyang kaugalingon, nga walay pagpakaila sa Lawas sa Ginoo. Tungod niini nga hinungdan daghan kaninyo ang mga masakiton ug mahuyang, ug ang uban nangamatay,” dugay nang, patay, og pormal nga mga iglesia. Ang Espiritu sa Dios mihawa na kaninyo. Wala na dinha ang Haligi nga Kalayo. Ginapanghimakak ninyo ang Balaanong pagpang-ayo. Ginapanghimakak ninyo ang pagkabanhaw.

173 “Oh,” moingon pa mo, “oh, nabanhaw Siya gikan sa mga patay, sumala sa kasaysayan.” Bueno, unsa man ang Iyang pagka-mao sa gihapon karon, kung nabanhaw Siya gikan sa mga patay? Moingon mo, “Oh, dili man kana ingon-niana.” Karon, mao lagi kana. Ginatoohan n’yo ang pagkabanhaw sa paagi nga gusto n’yong toohan kini, ug aduna man usab ang Dios og paagi nga gusto Niya niini.

174 Apan, ang punto man gud niini, nga miingon ang Biblia, nga ang nahibaloan nato nga Kamatuoran, nga pagapanghimatud-

an Niya ang Pulong. “Ug ang mga butang nga Akong ginabuhath pagabuhaton usab ninyo. Ug Ako magauban kaninyo sa kanunay, hangtud sa katapusan sa kalibutan.” “Si Jesus Cristo mao sa gihapon kagahapon, karon, ug hangtud sa kahangturan.” Mao kana mismo ang giingon sa Pulong.

175 Karon unsa ba ang sabbath?

...ang tanan nga mga lamesa nangapuno sa sinuka...wala ni usa man ang malimpyo.

Kinsa man ang iyang tudloan og kaalam?

Dili kalibutanon kaalam; kondili espirituwal nga kaalam!

Kinsa man ang iyang tudloan og kahibalo?...kinsa man iyang...pasabton sa balita?

176 “Oh, dalaygon ang Dios, ang among organisasyon dili man nagatoo Niini. Ayaw nilang dawaton Kana.” ...dili ko igsapayan kung unsa ma’y ginatoohan sa inyong organisasyon. Unsa ba’y ginasulti sa Dios mahitungod niini? “Oh, bueno, ang among mga pastor, kabalo ka, mga edukado baya.” Oh, bitaw. Mao gayud, hataas kaayo og edukasyon ang naangkon, pero gibiyaan nila ang Dios tungod niana. Tinuod gayud, tungod kay masulti mo man kanila ang Pulong ug talikdan lang nila ug moingon, “Bueno, dili man ko nagatoo Niini sa ingon-anang paagi.” Oh, binayot gyud! Sultihan ko kamo.

177 Tan-awa n’yo dinhi.

...kinsa man ang iyang...pahibaloon sa balita? sila ba nga mga nalutas sa suso, ug...sila nga mga nalutas sa gatas, ug ang mga gipanguha sa mga dughan.

178 Niadtong miaging adlaw, giadtoan ako sa usa ka silingan nako. Ingon siya, “Billy, may usa ka pastor dinhi sa siyudad, ang pinaka mahiligugmaon nga tawo nga makita mo sukad-sukad...” Miingon, “Nagalingkod kami sa akong asawa nga nagsul-ob na og pajama, mga tungang-gabii na kadto, ug miabot kadto nga pastor ug siya—siya—nangape siya uban kanamo ug miadto na pud siya sa pikas balay sa silingan, ug gilamano niya sila. Nagadula man sila og baraha niadto, ug milingkod siya ug nagdula pud og baraha uban kanila.” Miingon, “Oh, siya gyud ang pinaka mahigalaon nga tawo nga makita mo sukad-sukad.” Ingon pa, “Oh, mao nga gusto gyud namo siya. Dili gyud namo siya papahawaon bisan unsa pa.”

179 Mitindog ko didto sa makadiyut, sa hunahuna ko, “Bueno?”

180 Miingon, “Oh, sa hunahuna mo dili ba gikinahanglan sa matag iglesia ang usa ka tawo nga ingon niana?” Huh! Dili ko kadto mahimong tubagon. Ingon siya, “Didto sa usa pa ka gamay’ng lugar,” miingon, “aduna sila didto’y maanindot nga dapit. Kini nga ministro ug ang iyang asawa, mahiligugmaon nga mga tawo, nagaadto sila didto ug nagapakigkauban og ayo sa mga bata hangtud nga nagkaaduna na sila og usa—usa ka

Bible school.” Ug miingon, “Daghan kaayo sila, og gipuno nila ang maong lugar didto og mga bata.” Ingon pa, “Pagkanindot, nga ginasuginlan niya og tanan nang matang sa hamubong mga estorya ang mga bata.”

181 Ingon ko, “Maayo kana. Maayo gyud kana.”

182 Nakabalik na ako. Bag-o lang ko nakaabot niadto gikan sa Canada. Nahunahuna ko, “Ania ako. My! Ang mga tawo... Naunsa man ako? Dili ko man mabuhat ang ingon-adto.” Nagahugas ko niadto sa akong sakyanan. Nahunahuna ko, “Dios, nagakatigulang na ako, ug ania ako. Nakigbugno na ko. Mihilak na ko. Nagpakilooy na ko. Ug ang nakuha lang nako mao ang dakung panamastamas.”

183 Bisan unsa na lang, ang ginasulti nga dili maayo ni kinsa man mahitungod kanako, “Oh, ang tigulang nga holy-roller,” mora’g ingon niana.

184 Nakahunahuna ko mahitungod niana. Ug usa ka Tingog ang miabot kanako, miingon, “Kadtong mga kalalaken-an maayo man kung ginabuhat nila ang ingon-niana, apan wala Ko man ikaw gitawag para buhaton ang ingon niana. Gitawag Ko ikaw para kuhaon ang Espada ug mobarug dinha nga sama ni Josue ug manghagit, igsoon. Dili nga makig-uban-uban sa kung unsa nga kapunongan o kung unsa nga organisasyon sa iglesia, kondili hagiton ang yawa. Mobarug didto sa atubangan, tawgon ang husto nga husto, ug ang sayup sayup. Iwali ang Pulong ug hibaloon kung kinsa ang adunay pagtoo aron toohan Kini. Ipahimutang kini dinha.”

185 Gipaspasan gud nako ang paghugas, sa sakyanan, imbis nga hataas-taas unta nga oras. Ingon ko, “Salamat, Ginoo. Salamat, Ginoo.” Maayo na dayon ang akong gibati. “Okey lang, Ginoo, mas hugtan ko pa ang pagkupot sa espada, ug gusto ko nga mamatay nga anaa Kini sa akong kamot.”

... kinsa man ang akong *mahimo* nga pahibaloon sa *balita?* (Paminaw.)

... *ang mga lamesa nangapuno sa sinuka*...

... *sila nga mga nalutas sa gatas, ug ang mga gipanguha sa mga dughan.*

Karon himatikdi.

Kay kini mao ang sugo ibabaw—ibabaw sa sugo, sugo ibabaw sa sugo;...lagda ibabaw sa lagda; dinhi madiyutay, ug didto madiyutay:

Kay sa nagabungabunga nga mga ngabil ug sa laing mga dila ako mosulti niining katawohan.

Kanila miingon siya, Kini mao ang sabbath kon diin hatagan ninyo og pahulay siya nga ginakapoyan;...

kini mao ang mga makapahayahay: apan dili sila manimati.

Kay ang pulong sa GINOO miabot ngadto kanila (Adunay nagwali Niini.) sugo ibabaw sa sugo, . . . ibabaw sa sugo; lagda ibabaw sa lagda, . . . ibabaw sa lagda; dinhi madiyutay, ug didto madiyutay; aron sila mangadto, ug mangahayang, ug mangabali, ug hingbalag-ongan, ug hingdakpan.

¹⁸⁶ Unsa man ang Kapahulayan? Kanus-a man miabot ang Kapahulayan? Kaniadtong nanagsulti ang mga tawo og laing mga pinulongan ug nagabungabunga ang mga ngabil. Nagabungabunga ang mga ngabil; wala sila'y gisulti nga unsa man. Nagabungabunga ra sila. Kanus-a man kadto nahitabo? Sa Adlaw sa Pentecostes, sa diha nga mikunsad ang Espiritu Santo. Kadto mao ang Kapahulayan: ang Espiritu Santo. Miingon si Jesus, “Umari kamo Kanako, kamong tanan nga gikapoyan ug nabug-atan, ug hatagan Ko kamo og Kapahulayan. Hatagan Ko kamo og Kinabuhi, Kinabuhing Eternal,” *Zoe*, Kinabuhi mismo sa Dios. Ang Dios mosulod kaninyo ug mamahimong kabahin ninyo. Hatagan Niya kamo og usa ka pagkahimugso ug himoon kamong anak nga lalaki ug anak nga babaye.

¹⁸⁷ Karon matikdi n'yo. Kadto mao ang ikatulong kapahulayan nga Iyang gihatag. Ang una: gidawat kadto sa Dios, gikan sa Iyang pagpamuhat. Ikaduha: gidawat kadto sa Israel, sa kasugoan. Ikatulo: gidawat Kini sa Iglesia, ingon nga kabahin sa Dios.

¹⁸⁸ Ang tulo mao ang numero sa kinabuhi. Pila man ang nasayod niana? Sa matag higayon nga makakita kamo og tulo, kinabuhi kana. Matikdi n'yo, kaniadtong gibuhat sa Dios ang yuta, sa ikatulong adlaw mao ang kinabuhi. Pila man ang nasayod niana? Sa ikatulong adlaw. Aduna na og kinabuhi sa ikatulong adlaw sa paglalang.

Ang trinidad: ang Amahan anaa ibabaw sa mga tawo, sa usa ka Haligi nga Kalayo; ang Anak usa ka Tawo, Nga nagpakigsulti sa mga tawo ug gipaandam sila; ang Espiritu Santo mao ang ikatulong ang-ang, ang Espiritu Santo, ang Dios diha sa mga tawo. Kinabuhi! Ang Amahan, Anak, . . .

Ang kapahulayan, nga iya sa Dios; ang kapahulayan, nga iya sa Israel; ug ang Kapahulayan, nga iya sa Iglesia, ang pagsaulog sa sabbath.

¹⁸⁹ Busa, kung wala pa ninyo nadawat ang Espiritu Santo, sa karon, nan wala pa kamo nakasulod sa Kapahulayan sa Dios. Dili n'yo kinahanglan mosulti, “Oh, dili nako mahimo. Gusto pa man nako nga manigarilyo. Ako—dili gyud nako mahimo kana; usa na baya ako ka Cristohanon. Dili na gyud unta ko gustong moinom og makahubog, tungod usa man ako ka Cristohanon.

Dili gyud lagi nako mahimo, dili na unta ko gustong moinom og ilimnong makahubog, pero ginatinguha man gihapon nako.”

¹⁹⁰ Kung nagapangibog ka pa sa mga babaye, kung ginabuhat mo pa kining tanan nga mga dautang butang, nan wala ka pa nakadangat nianang panahon sa Kapahulayan. Wala ka pa nakasulod sa imong Kapahulayan.

¹⁹¹ Ug pag makasulod na kamo niini nga Kapahulayan, nan moundang na kamo sa inyo mismong kalibutanong mga buhat, sama ra nga miundang ang Dios sa Iyang mga pagpamuhat kaniado. Ngano man? Tungod kabahin man kamo sa Dios. Eternal na kamong, nagapahulay. Mao kana. Mao kana ang Sabbath. “Umari kamo Kanako, kamong tanan nga gikapoyan.”

Karong adlaw, siya nagtudlo og usa ka adlaw, . . . human sa hataas nga panahon, diha kang David; . . . kon kamo makadungog sa iyang tingog, ayaw ninyo pagahia ang inyong mga kasingkasing.

¹⁹² Karon dinhi usa na lang ka pulong o duha pa, dayon mahuman na kita.

Kay siya nga nakasulod sa kapahulayan ni Cristo, . . . Umari kamo kanako, kamong tanan nga gikapoyan ug . . . nabug-atan . . .

. . . kamo miundang na sa inyong mga pagpamuhat, maingon nga miundang niado ang Dios sa iyang mga pagpamuhat, sa ikapitong adlaw.

Ang sa inyo tingali'g sa ika-traynta nga tuig n'yo, sa ika-kuwarenta nga tuig, sa ikalima nga tuig, o unsa pa man. Miundang na kamo sa inyong mga buhat, maingon nga miundang sàb ang Dios sa Iyang mga pagpamuhat, sa Walay Katapusan. Dili n'yo na ginatinguha pa ang mga butang nga iya sa kalibutan. Patay na ang kalibutan nganha kaninyo.

¹⁹³ Karon, sa ika-11 nga bersekulo karon, paminaw og ayo.

Busa maninguha kita sa pagsulod niana nga kapahulayan, (dili kining usa, dili pud kining usa, kondili Kining usa), aron walay bisan kinsa nga tawo nga mahulog sa mao usab nga panig-ingnan sa pagkamasukihon.

¹⁹⁴ Unsa man kini? Ania karon ang Haligi nga Kalayo. Ania uban kanato ang Manulonda sa Ginoo. Ginabuhat Niya ang mao ra mismong mga butang nga Iyang giingon nga Iyang pagabuhaton. Ug nagakapangdol ang mga tawo, moingon, “Oh, bueno, siguro okey lang Kana. Maayo gyud kana. Oh, maayo man siguro Kana.” Magbantay gyud kamo nga dili kamo mahulog sa mao gihapon nga lit-ag sa pagkamasukihon. Mao nga dawata ninyo Kini sa tibuok n'yong kasingkasing.

¹⁹⁵ Matikdi n'yo.

Kay ang pulong sa Dios (dili ang doktrina sa iglesia), ang pulong sa Dios mas buhi, mas gamhanan, . . . labi pang mahait kay sa usa ka espada nga duhay sulab, (paminaw mo), nga nagadulot ngadto . . . sa gitagboan sa kalag, sa espiritu, . . . sa mga lutahan ug sa kauyokan, ug . . . (paminaw), ug magtutugkad sa mga hunahuna ug sa mga katuyoan sa kasingkasing.

Unsa man kana? Mahimong moanhi ang Balaang Espiritu ug moingon, “Gibuhat mo ang *ingon-ani-ingon-ana* nga butang. Ug gibuhat mo ang *ingon-ani* ug gibuhat ang *ingon-ana*. Aduna ka og *ingon-ani* nga matang sa balatian, ug *ingon-ana*. Kung himoon mo *kini* nga mahusto, nan buhaton mo ang *ingon-ana*.” Kita n’yo? Magtutugkad sa mga hunahuna.

¹⁹⁶ Ug moingon ang mga tawo, “Unsa diay kana? Aba, kana’y pagbasa ra man sa hunahuna. Aba, usa kana ka . . . Usa siya ka manghihimalad.” Nasabtan n’yo ba ang buut kong ipasabot? Usa kini ka dautan, og dugay nang mananapaw nga kalibutan nga wala nakaila sa Dios.

¹⁹⁷ “Kini’y mas buhi, mas nagahunahuna, mas gamhanan kaysa usa ka espada nga duhay sulab, ug magtutugkad sa mga hunahuna ug sa mga katuyoan sa kasingkasing.”

Karon, unsa man kanang nasayod sa mga katuyoan sa kasingkasing? Ang Dios. Moingon mo, “Bueno, ang ingon sa Biblia, ‘Ang Pulong sa Dios.’” Ang Pulong sa Dios mao man ang Dios.

Sa sinugdan mao na ang Pulong, . . . ang Pulong kauban sa Dios, ug ang Pulong mao ang Dios.

Ug ang Pulong nahimong unod, ug nagpuyo ipon kanato, . . .

¹⁹⁸ Ang Dios nagatugkad sa mga hunahuna. Ngani nakatalikod niadtong si Abraham, ug—ug nakatalikod usab ang Dios sa balongbalong. Ug mikatawa si Sarah. Ug milingi ang Dios, miingon, “Nganong mikatawa man si Sarah?” Usa gayud ka Magtutugkad sa mga hunahuna sa kasingkasing! Gusto ko nga motuhop kana og diyutay.

¹⁹⁹ Dayon sa diha nga mitungaha na ang ingon-ana nga matang sa ministerio, nga gikasaad sa Dios para sa kaulahiing adlaw, unsa ma’y nahitabo? “Pagbasa ra kono sa hunahuna.”

²⁰⁰ Dili ba gitawag man nila ang Ginoo, Mismo, “Beelzebub”? Miingon Siya, “Kung gitawag nila ang Agalon sa balay og ‘Beelzebub,’ unsa pa kaha ang ibansag nila sa Iyang mga tinun-an?”

²⁰¹ Gihigugma ko kamo. Nagapakita lang kini nga interesado gayud kamo, dili n’yo kinahanglan motambong sa usa ka naka-aircon nga bilding aron nga madungog ang Ebanghelyo. Nagahinam-hinam gayud kamo nga motambong sa usa ka lugar

nga sama niini. Dili gyud motugot ang Dios nga magtukod og lahi kondili kini ra gyud. Gusto man nato kining ingon niini. Usa ra ka gamay og daan na nga payag, pero sa ingon-ana man nato nagustohan kini. Dili man nagapuyo ang Dios diha sa kamadanihon. Nagapuyo ang Dios diha sa pagkamapainubsanon. Gusto nato ang ingon niini. Malipayon kita nga makaanhi, ug kamo man, usab, aron maania sa usa—usa ka lugar nga sama niini. Bisan unsa pa ka init dinhi, bisan pa panington kamo og ayo nga sul-ob ang bag-o n’yong amerikana, ang bag-o n’yong bistida, wala gyud kana’y diperensya.

Tungod ang inyong ginapaminaw mao man ang Kinabuhing Eternal, ang Pulong sa Dios nga nasayod sa mga hunahuna sa inyong kasingkasing. Ang Haligi nga Kalayo nga atua nagapaibabaw kaniadto sa mga anak sa Israel, ania sàb karong gabhiona. Mahimo kong mohagit: nga wala ni usa ka tawo ang makatindog dinhi ilalum sa gahum sa Espiritu Santo nga dili siya ginabutyag sa Dios ug isulti kaniya kung unsa siya. Husto kana. Mao kana.

²⁰² Unsa man Kini? Unsa man Kini? Kini ang mao sa gihapon nga Espiritu nga nanguna kaniadto sa mga Anak sa Israel paingon sa ilang kapahulayan, ug nangapukan sila tungod sa pagkamasukihon. Dili unta kamo mapukan. Mao na kini ang ulahing kahigayonan. Amahan, Anak, ug Espiritu Santo, nagagikan dinha ang Kinabuhi.

²⁰³ Ang pagpamatarung, ni Martin Luther, usa man gihapon ka porma sa relihiyon. Ang pagpabalaan...si Martin Luther; si John Wesley; ang bautismo sa Espiritu Santo, Kinabuhi. Ang pagpamatarung, mao ang pagtoo; ang pagpabalaan, mao ang paglimpyo; ang Espiritu Santo, mao ang pagpuno, Kinabuhi. Dili nga pinaagi sa kapanahonan ni Luther; naangkon nila Kini sa usa ka porma. Dili pinaagi sa kapanahonan ni Wesley; naangkon pud nila Kini sa usa ka porma. Apan mao na kini ang kapanahonan diin nagaabot ang Espiritu Santo, Mismo.

²⁰⁴ Ug kung wala pa ninyo nadawat Kini, sa unsa mang paagi ninyo, toohan ang mga milagro? Ingon nga gikinahanglan man ang Dios, sa sulod ninyo, aron makatoo. Nagalihok kamo nga sama sa Dios. Makaila kamo nga sama sa Dios. Nagahunahuna kamo nga sama sa Dios. Miingon ang Biblia nga kamo mao’y gagmay, gamay nga “mga dios.” Mao kana’y giingon ni Jesus. Kay, kabahin man kamo sa Dios.

Sama lang nga usa ako ka gamay’ng Branham, ug kamo’y gamay’ng kung-kinsa-man kamo, ug tungod kay ingon-ana man ang ngalan sa inyong mga ginikanan. Ingon-ana ang inyong kinaiyahan tungod kay ingon-ana man pud ang inyong mga ginikanan, tungod kay gipanganak man kamo diha kanila.

Ug ang hinungdan nga nagatoo kamo sa Dios, ug nagatoo sa mga milagro, ug sa mga ilhanan ug mga katingalahan, tungod

kay mga anak nga lalaki ug mga anak nga babaye man kamo sa Dios. Nadawat ninyo ang Kinabuhi. Ang Kinabuhi nagaabot sa ikatulo. Oo.

²⁰⁵ Kaniadtong misaka si Jesus sa bukid, bisan asa man Siya miadto, ginadala Niya sila ni Pedro, Santiago, ug Juan, tulo ka saksi. Ang tulo mao ang numero sa Kinabuhi. Nasabtan n'yo ba? Gugma, kalipay, pakigdait.

²⁰⁶ Karon, moadto na kita ngadto sa katapusan sa maong kapitulo, sa gilayon, samtang magabasa kita.

Kay ang pulong sa Dios mas buhi, mas gamhanan . . . kaysa espada nga duhay sulab, . . . ug ginatugkad bisan ang mga katuyoan sa kasingkasing.

Ug walay binuhat nga dili madayag sa iyang atubangan: kondili ang tanang mga butang . . . binuksan sa atubangan sa mga mata niadtong atong pagahatagan og husay.

²⁰⁷ Igsoon, walay usa ka langaw nga makatugdon dinha sa usa ka poste, nga dili Niya mahibaloan. “Dayag ang tanang butang.” Igsoon, hingsayran Niya ang matag butang nga gibuhat mo, ang matag hunahuna nga gihunahuna mo. Ingon niana Siya. Nagatoo kita Kaniya nga ingon niana.

Ug pag mosulod na ang Dios nganhi kanato, ug ipahimutang kita sa Iglesia, nagapahimutang Siya og mga gasa ug mga ingon-anang butang sa Iglesia, aron makapamuhat ang Iyang Persona. Kung ang Dios mao ang walay-kinutoban nga Dios, nan ginaayo Niya ang mga may sakit. Mahimo Niyang banhawon ang mga patay. Mahimo Niyang limpyohan ang mga may sanla, himoon nga makakita ang mga buta. Mahimo Niyang maghatag og mga panan-awon. Mahimo Niya ang tanan nang matang sa ingon niining mga butang, og mamuhat pinaagi sa Iyang Iglesia, tungod kay ang Dios man kini nga anaa kaninyo. Ingon ana ang Iglesia.

²⁰⁸ Unsaon man niana nga iglesia nga mahimong usa ka Iglesia, pinaagi ba sa pagpasakop Niini? Dili, sir. Pinaagi ba sa pagpakiglamano? Dili, sir. Pinaagi ba sa bautismo sa tubig? Dili, sir. Sa pagpamiyembro ba? Dili, sir. Unsaon man ninyo sa pagpakadawat Niini? “Kay pinaagi sa usa ka Espiritu kitang tanan gibautismohan ngadto sa usa ka Lawas.” Mao kana.

²⁰⁹ Mga Taga-Roma 8:1.

Busa karon wala na’y pagkahinukman sa silot . . .

“Wala na’y pagkahinukman sa silot tungod sa pagkakalibutanon.” Walay unsa man nga mahimo nilang ipasangil kanimo.

Busa . . . wala na’y pagkahinukman sa silot niadtong mga anaa na kang Cristo Jesus, nga wala nagakinabuhi uyon sa unod, kondili uyon sa Espiritu.

210 Mao kana. Sa ingon-anang paagi n'yo angay'ng hukman ang inyong pagka-Cristohanon. Sa ingon-anang paagi n'yo masayran kon nakasulod na kamo niana nga Kapahulayan, kon dili na kamo ginasamok pa sa kalibutan. Mao gayud. Kon makita n'yo kini, pahilayo kamo niini. Aduna ma'y mas maayong butang nga angay n'yong hunahunaon. Mao kana, "Wala na'y pagkahinukman sa silot." Sa ingon-anang paagi kita makasulod sa Lawas.

211 Ug may kasiguradohan na kamo, "Hangtud sa kahangturan." Mao kana'y giingon sa Biblia. Tan-awa n'yo dinhi sa Mga Hebreohanon, sa ika-10 nga kapitulo. Ingon siya:

Kay sa mga halad nga mga baka ug paghalad, *adunay handumanan nga gihimo mahitungod sa sala sa tuig-tuig.*

Apan siya . . . pinaagi sa usa ka halad . . .

Dalaygon ang Iyang balaan nga Ngalan!

Kay pinaagi sa usa ka halad gihingpit niya hangtud sa kahangturan . . .

212 Alleluyah! Dili nga hangtud ra sa sunod nga rebaybal, kondili *hangtud sa kahangturan*. "Ang mga daang butang nanagpangagi na; ug ang tanang mga butang nangabag-o na." Nagalakaw kita sa Kahayag, sa matahum nga Kahayag. Lahi na ang ginaawit sa mga langgam.

213 Atua ako niadto, nga ginataw-aw kadtong luoy'ng palahubog, mga lima ka tuig na ang milabay, siguro. Si Rosella, nga malibat na ang mga mata, sa kahubog, nagalakaw didto sa dalan sa Chicago, nga nagasarasay, nga nahilambigit sa tanan nang matang sa sala, hubog ug tanan na nga mahimo siyang mahilambigit. Ug usa ka gabii, ang Balaang Espiritu, nga mas buhi ug mas gamhanan kaysa usa ka espada nga duhay sulab, miingon, "Babaye, usa ikaw ka palahubog." Alleluyah! Kung dili kadto ang mao ra nga Dios nga atua kaniadto, nga nasayod nga mikatawa si Sarah sa luyo Niya, wala na ko kabalo kung unsa Siya.

214 Didto sa mga mananambong sa usa pa ka babaye nga kauban niya nga mitambong, ug misulod didto, ang ingon, "Usa ikaw ka adik sa droga." Matugkad gayud Niya ang mga hunahuna sa panghunahuna!

215 Ug dunay nagalingkod didto nga bantugan nga mga aristokratang ministro, nga adunay pangtibuok-kalibutan nga pagpang-ebanghelyo, nga nakakuyogpos ang ilang mga kamot, nakasul-ob og T-shirt, abi nila'g dili nato sila mailhan, nga mahimo silang motambong sa usa ka panagtigum nga sama niadto ug dili ipadayag sa Dios kung kinsa sila. Nagalingkod didto, nga lahi ang hitsura, nga daw sa ubang tawo ra sila. Pero naila sa Espiritu Santo kung kinsa sila. Ug nagalingkod

sila didto, nga sulod sa ilang mga kasingkasing, naghunahuna sila nga Kadto'y pagbasa ra sa hunahuna. Pero wala gyud sila'y nahibaloan mahitungod sa Dios sama sa usa ka Hottentot nga walay nahibaloan mahitungod sa kabalyerong Egiptohanon. Tinuod kana. Hinoon nasayran nila Kini sumala ra sa letra, pero dili pinaagi sa Espiritu. "Ang letra nagapatay, apan ang Espiritu nagahatag og Kinabuhi." Mao gayud. Ingon niana mismo. "Mas buhi, mas gamhanan kaysa usa ka espada nga duhay sulab, usa ka Magtutugkad sa mga hunahuna sa kasingkasing."

216 Paminaw. Matikdi n'yo.

Ug walay binuhat nga dili madayag sa iyang atubangan: kondili ang tanang mga butang mga hubo ug binuksan sa atubangan sa iyang mga mata . . . niadtong atong pagahatagan og kwenta.

Busa nabatnan ta ang usa ka labaw'ng sacerdote . . . (Paminaw mo ha; ang mga may sakit.) . . . nga nakalatas sa kalangitan, si Jesus ang Anak sa Dios, managlig-on kita sa atong pagsugid.

217 "Managlig-on," wala kana nagapasabot nga magapadayon ka lang sa pagtestimonyo. Kay kung wala n'yo ginakinabuhì ang kinabuhi, wala kamo nagmalig-on niini; nagakinabuhì kamo nga nagapakaaron-ingnon lang. Kamo'y . . . Mas maayo pa nga dayag kamo ug mosulti lang nga usa kamo ka makasasala ug hikalimtan na ang bahin niana. Ayaw na lang mo pagpamahayag nga usa mo ka Cristohanon, pero nagakinabuhì diay nga lahi; tungod mamahimo lang kamo nga pinakadakung kapandolan nga aduna ang kalibutan. Kung makasasala kamo, nan angkona n'yo ug magpadayon na, nga magpasig-uli sa Dios. Kung Cristohanon kamo, nan lig-ona n'yo ang inyong pagpamahayag, og magpabilin gyud dinha.

218 Matikdi n'yo kini karon. Gusto kong hisgotan sa kini sa dili pa kita manguli.

Kay kita walay labaw'ng sacerdote nga dili arang matandog sa pagbati sa atong mga kaluyahon; kondili usa nga gitintal sa tanang mga paagi sama . . . kanato, apan walay sala.

Paminaw mo.

Busa manuol kita nga may pagpangahas ngadto sa trono sa grasya, aron kita makadawat sa kalooy, ug makakaplag sa grasya ug makatabang kanato sa takna sa pagkinahanglan.

Dalaygon ang Ngalan sa Dios!

219 Paminaw mo, Baptist, Presbyterian, Lutheran. Basin pangutan-on n'yo ako og ingon-ani nga pangutana, "Gitooan ni Abraham ang Dios, ug kadto'y giisip kaniya nga pagkamatarung." Kabalo ko. Dinha man gyud kamo paingon.

Tinuod kana. “Unsa pa ba ang mahimong buhaton sa usa ka tawo kondili toohan ang Dios?” Eksakto gayud. Mao lang kana ang puede niyang buhaton. Apan pag ilhon na sa Dios kana nga pagtoo, ihatag man Niya kanimo ang Espiritu Santo.

²²⁰ “Karon unsa ma’y angay kong buhaton, Igsoong Branham? Mosinggit ba ako?” Dili man kinahanglan. “Magsulti ba ako og laing mga pinulongan?” Dili man kinahanglan. Makasinggit ka man ug makasulti og laing mga pinulongan, dungan, ug magkinabuhi sa gihapon nga sama sa usa—sama sa usa ka pagano, ug mangibog gihapon sa mga babaye. Mahimong manigarilyo gihapon ka ug maghubog-hubog, ug tanan nang uban pa. Nakakita na man gud ko og mga tawo nga nanagsulti og laing mga pinulongan, ug pag manggawas na nagabuhat gihapon sa pipila sa mga pinakamahugaw, malimbongon nga mga transaksyon nga nakita ko sukad-sukad. Nakita ko sila nga nanagsinggit, ug nagahilak-hilak, ug mangawat gihapon sa kung unsa man nga ilang mahawiran. Nakita ko sila nga nanggawas, ug ang matag babaye nga nagalakaw sa kalsada, ilang ginalingi. Uh-huh. Usa kana ka sigurado nga timailhan nga wala pa ninyo Kini naangkon. Husto.

²²¹ Apan, igsoon, pag miagi ka na gikan sa kamatayon ngadto sa Kinabuhi, ang tanan niana nga mga butang mahimong patay na, ug usa ka na ka bag-ong binuhat diha kang Cristo Jesus. Kung aduna ka’y makita nga sayup, igaampo mo kana, “Dios malooy Ka.” Ug kung may makita ka nga mga problema, imbis nga molakaw ug itabi-tabi, ug samuton pa kini, paningkamotan mo hinoon nga adtoan ang maong tawo ug ihusto kana, ug ipakalma sa gilayon ang maong panghitabo. Ang Espiritu sa Dios kana nga anaa sa sulod mo.

²²² Kung masayup ka? Hinoon napailalum ka man nga makabuhat gyud niana. Mao nga kung masayup ka, ihusto mo kini sa gilayon. “Ayaw pasalopi sa adlaw ang imong kasuko.” Sa ingon niana mo mahibaloan nga miagi ka na gikan sa kamatayon ngadto sa Kinabuhi, aduna ka og gugma, pakigdait, kalipay, pagkamapuanguon, pagkamaayo, kaaghop, pagpailub. Aduna kita’y Labaw’ng Sacerdote nga anaa sa Langit, nga andam sa pagpangaliya para sa atong pagsugid. Unsa man kini? Kini’y maoy sa dihang mibalik si Jesus sa pagka-Logos, ang Haligi nga Kalayo nga nanguna sa mga anak sa Israel, nga atua sa Presensiya sa mga halangdon, sa tuboran, sa balangaw sa mga Kahayag nga nagasiga, ang pito ka hingpit nga mga Espiritu, usa ka hingpit nga Espiritu sa gugma.

²²³ Karon matikdi. Ang una mao ang *hingpit* nga gugma, kana mao ang gugma sa Dios, nga putli ug walay-sambog. Ang sunod, nga mitungha dinha, ang gugmang *phileo*, mao kana ang gugma nga aduna ka para sa imong asawa ug sa imong mga anak. Ang sunod, human niana, ang sa *pangibog* nga gugma. Ang sunod mao ang *dautan* nga gugma. Ug padayon nga nagakaubos

hangtud nga kini'y *kahugawan* na, nga padayon nga nagakatuis, og nagakatuis.

²²⁴ Ug ang tanan nga adunay sinugdanan, aduna pu'y katapusan. Ug kana tanan pagawagtangon sa gilayon, ug dili na mahinumduman, man lang, ug magabalik mismo sa pagkahingpit, sa umaabot nga adlaw. Ug ang bugtong paagi. . . Dili ka puede nga mohunong dinhi, sa tunga-tunga sa dalanon, ug dayon modangat na *dinhi*. Kinahanglan nga bug-os gyud kang anaa sa sulod, nga nagasalig, bug-os nga nagasandig sa kaluwasan nga gikahatag ni Jesus Cristo kanimo, pinaagi'g pagtoo.

²²⁵ Adunay Espiritu sa pagkamatinuuron nga nagagikan sa Dios. Mao kana ang tuboran, tuboran sa Dios. Kana ang pagkamatinuuron. Ang sunod mao ang tawo nga mohimo og "maayo nga buhat" para sa iyang isig-katawo. Ang sunod mao ang tawo nga, "kinahanglan mong bantayan siya." Ang sunod mao ang tawo nga, "usa ka kawatan." Ang sunod mao ang tawo nga, "usa ka mamununo," og nagapanulis. Kita n'yo na kung unsa nga nagakatuis kini, sa pagpadayon niini? Apan ang tanan niining mga butanga nagapahinungod sa usa ka tinuod.

²²⁶ Mao kana ang ginaingon ko. Sa matag higayon nga makakita ka og usa ka tawo nga. . . Makakita ka og magtiayon nga nagalakaw sa dalan, nga naghigugmaay gayud, bisan tingali'g otsenta anyos na sila. Nagapahinungod lang kana nga sa Langit aduna didto'y batan-ong magtiayon nga nagarepresentar kanila, sa Langit. "Kung kining yutan-ong tabernakulo matun-as man, aduna na kita'y usa Didto."

²²⁷ Kung makakita pud ka og usa ka tawo nga nagapanglimbong, nagapangawat, nagapamakak, hinumdumi lang, may bahin siya nga nagahulat didto sa impiyerno, para kaniya, iyang dapit kon diin pagasakiton siya sa Atubangan sa Dios ug sa balaang mga Anghel, pinaagi'g kalayo ug asupre. Pagasakiton siya didto. Dili hangtud sa kahangturan, dili man mahimo nga sakiton siya hangtud sa kahangturan, tungod ang hangtud sa kahangturan dili man nagakahulogan nga tanan na, sa tanang panahon. Ang Eternidad mao'y hangtud sa kahangturan, ang Eternidad mao'y. . . walay sinugdanan ni katapusan man. Apan ang *hangtud sa kahangturan* "usa ra ka gidugayon sa panahon." Ang ingon sa Biblia, "Hangtud sa kahangturan ug," pang-sumpay, "hangtud sa kahangturan." Ngani miingon si Jonas nga atua siya sa sulod sa tiyan sa balyena "hangtud sa kahangturan." Nga usa ra ka gidugayon sa panahon.

²²⁸ Apan, ania, aduna lamang og usa ka Kinabuhing Eternal, ug ang Dios kana. Ug kung pagasakiton ka man hangtud sa kahangturan, ug dili mamatay, nan aduna ka diay og Kinabuhing Eternal. Mao nga dili mamahimo nga pagasakiton

ka hangtud sa kahangturan. . . Tingali'g pagasakiton ka sulod sa usa ka gatus ka milyon ka tuig, sa Atubangan sa Dios ug sa balaang mga Anghel, pinaagi'g kalayo ug asupre. Wala ko masayod kung unsa gyud ka dugay kana gikatakda. Apan sa kaulahian modangat gyud kana sa katapusan tungod aduna man kana'y sinugdanan. Ug ang Dios lamang ang adunay Kinabuhing Eternal. "Ang nagapatalinghug sa Akong mga Pulong, ug nagatoo Kaniya nga nagsugo Kanako," walay *hangtud sa kahangturan* nga kinabuhi kondili, "aduna siya'y Kinabuhing Eternal." Kana nga Kinabuhi nga misugod, dili og unsa man nga gikan *dinhi*. Kondili gikan mismo Didto, Kinabuhing Eternal, *Zoe*, ang Kinabuhi Mismo sa Dios nga mikanaug ug nagapuyo sa tawo, ug Eternal niyang makauban ang Dios, ug dili na mahimong mamatay. Mao kana ang giingon sa Pulong.

²²⁹ Hunahunaa lang ninyo kana. Aduna ba'y duha ka Kinabuhing Eternal? Dili n'yo matubag kana, dili ba? Aduna man gud og usa ra ka Kinabuhing Eternal, ug kana mao ang Kinabuhi sa Dios. Kining usa pa ka matang sa kinabuhi, bisan unsa pa kini, aduna gyud kini'y katapusan. Ug ang unsa man nga dunay sinugdanan aduna pu'y katapusan. Apan ang unsa man nga walay sinugdanan wala pu'y katapusan. Ug miingon ang Dios nga hatagan Niya kita og Kinabuhing Eternal, nga walay sinugdanan, gibuhat kita mismo nga kabahin Niya. Ug sa tinuod lang ang Kinabuhi nga ania sa sulod nato, wala gidala dinhi pinaagi sa tawhanong kinaiyahan. Hinoon gihatagan kita sa kinaiyahan og usa ka espiritu, pero namatay kana nga espiritu, ug mao nga aduna kita'y Espiritu sa Dios. Himaya sa Dios!

²³⁰ Usa ba ka tawo ang Dios? Mao gayud. "Buhaton Nato ang tawo diha sa Atong Kaugalingong dagway." Unsa man ang Dios? Usa ka theophany, usa ka lawas. Ug dinha ang tawo gibuhat nga ingon niana ug gipahimutang didto sa tanaman. Pero wala pa'y tawo kaniadto nga magatikad sa yuta, nga adunay sensya. Mao nga gilalang Niya ang tawo gikan sa abog sa yuta, diha sa kahayopan, ug kadto nga tawo ang nagtikad sa yuta. Ug nahulog ang tawo, tungod sa paglapas. Tinuod gyud. Ug ang Dios, ang Theophany, mikanaug ug nahimong unod ug nagpuyo ipon kanato, aron tuboson ang tawo.

²³¹ Busa wala kamo'y arang nga mabuhat. Makasasala kamo, sa sugod pa lang. Giumol kamo diha sa kadautan. Natawo kamo sa sala, mianhi sa kalibutan nga nagapanulti'g bakak. Natawo kamo dinhi niining kalibutana pinaagi'g pangibog sa pakighilwas sa inyong amahan ug inahan. Ug sigurado gyud nga pa-impiyerno kamo, dili ko igsapayan kung unsa ma'y ginabuhat n'yo. Mahimong wala gyud kamo nakapamakak, nakapangawat; ginatuman mismo ang tibuok kasugoan, ug tanan nang uban pa; ug pa-impiyerno kamo sa gihapon, sama sa

usa ka langgam paingon sa salag niini. Apan ang bugtong paagi nga mabuhi kamo pag-usab, mao ang dawaton ang Balaang Espiritu, ang Kinabuhing Eternal sa Dios.

²³² Unsa man ang nagpahimo kaninyo nga mamaingon niana? Sa sinugdanan, kaniadtong gilumluman sa Espiritu Santo ang yuta, wala pa'y unsa man kaniadto gawas sa pagbuto sa bulkan. Usa ka bulak sa pasko sa Pagkabanhaw ang mitungha. Miingon ang Dios, "Maanindot kanang tan-awon. Padayon ka lang sa paglulum." Nanungha ang mga bulak. Nanubo ang mga sagbot. Nanubo ang mga kahoy. Nanglupad ang mga langgam gikan sa abog. Nanungha ang mga hayop. Mitungha pud ang tawo.

²³³ Karon, giunsa man kadto pagbuhar? Pinaagi sa paglulum sa Balaang Espiritu, nga gihiusa kadtong mga materyales, nga potash, calcium; og gihimo ang mga bulak, gihimo ang hayop, gihimo pud kamo.

²³⁴ Ug karon, aduna kamo'y gawasnon nga pagpili. Gilumluman kamo pag-usab sa Dios ug miingon, "Patalinghugan n'yo ba ang Akong Tingog? Ayaw n'yo pagahia ang inyong kasingkasing, sama niadtong mga adlaw sa paghagit." Ania mikanaug gyud Siya, og ginawali ang Pulong.

"Ang Ebanghelyo nga gikawali kanila wala . . . wala Kadto pag-ubani og Pagtoo, busa wala Kadto'y nahatag nga kaayohan kanila." Nadungog nila Kadto, pero wala nila Kadto gitooan.

²³⁵ Ngani mikanaug pa ang Dios. Gipakita Niya kanila ang usa ka Haligi nga Kalayo. Nagpakita pinaagi sa Iyang propeta, og mga ilhanan ug mga katingalahan, ingon nga Siya nagauban kaniya. Pero wala gihapon nila Kadto gitooan. Oh, gusto man nila nga makakita og mga milagro. Gusto nilang maminaw sa propeta. Pero paghisgotan na ang pag-too Niini, wala sila mitoo. Ang ilang mga kinabuhi nagapamatuod man nga wala sila nanagpanoo.

²³⁶ "Karon," ingon Siya, "Likayi gyud ninyo nga mahulog sa mao gihapon nga panig-ingnan sa dili-pagtoo." Kay sa niining kaulahiing adlaw, sa iglesiang Gentil, nagpakita pag-usab ang Dios; sa mao ra nga ilhanan, mao ra nga katingalahan, mao ra nga Haliging Kalayo, nga gipanghimatud-an, og gipamatud-an. Mao nga dili unta nato pagahion ang atong mga kasingkasing ug mahulog niana nga pagsulay sama kaniadto, sa pagkawalay-pagtoo, kay mangadugta ra man kita dinhi ibabaw sa yuta ug mao lang kana.

²³⁷ Ug pag manuktok na ang Balaang Espiritu diha sa inyong kasingkasing, [Ginadukdok ni Igsoong Branham ang ibabaw sa pulpito—Ed.] "Human sa hataas nga panahon, pag madungog ninyo ang Akong Tingog, ayaw n'yo pagahia ang inyong kasingkasing." Ingon pa, "Anak Ko, kini mao ang Kamatuoran." Ayaw pagtan-aw sa mensahero. Paminawa n'yo ang Mensahe.

Toohi n'yo Kini. "Ayaw n'yo pagahia ang inyong kasingkasing, sama niadtong mga adlaw sa paghagit."

²³⁸ Pag madungog sa tawo ang Iyang Tingog, "Ayaw n'yo pagahia ang inyong kasingkasing." Dayon moingon kamo, "Oo, Ginoo, nagatoo ako." Kung ingon-niana nagasulod kamo sa Kinabuhi, nagasulod kaninyo ang Balaang Espiritu. Mamatay ang kanhi n'yong espiritu, nga nagapahimo kaninyo nga mangibog ug magdumot, ug manghimaraut ug mangaway, ug—ug pagdumot ug tanan nang mga ingon-anang butang, mamatay na. Ug mahimo na kamong puno sa gugma, kalipay, pakigdait, pagpahulay. Bisan unsa man kakusog ang paghaguros sa hangin, okey lang.

Ang akong angkla nakakupot na sulod sa tabil;
Bisan sa matag makusog ug mabagyohon nga
hangin,

Ang akong angkla nakakupot sulod sa tabil.

Kay kang Cristo, ang malig-on nga Bato, ako
nagabarug;

Ang tanang ubang mga dapit balas lang nga
nagakaunlod.

²³⁹ Tan-awa. Si Eddie Perronet, ingon nga gisulat niya kanang inila nga awit. Ang tanang ubang mga dapit, ang tanang mga denominasyon, ang tanang mga kredo, ang tanang mga doktrina, mangahanaw. Gawas ni Cristo!

Moingon mo, "Bueno, nasayod man ko sa Biblia." Dili n'yo maangkon ang Kinabuhi pinaagi'g paghibalo sa Biblia.

"Nasayod ako sa akong katekismo." Dili n'yo maangkon ang Kinabuhi pinaagi'g paghibalo sa inyong katekismo.

"Bueno, usa man ako ka Cristohanon." Dili n'yo maangkon ang Kinabuhi pinaagi'g pagpamahayag nga Cristohanon kamo.

²⁴⁰ Aduna kamo'y Kinabuhi pinaagi sa pag-ila Kaniya. Sa pag-ila Kaniya, aduna kamo'y Kinabuhi. "Kung ingon-ana nagasulod kamo sa Iyang Kapahulayan. Miundang na kamo sa inyong mga buhat, maingon nga miundang niadto ang Dios sa Iyang pagpamuhat." Gihimo kamong usa ka anak sa Dios, usa ka mag-aambit sa Dios. Ug kung ang—kung ginaagda kamo nianang Balaang Espiritu, ug ginaagda mo usab ug moingon, "Oo, Ginoo," o motubag.

²⁴¹ Moingon, "Umari kamo Kanako, kamong tanan nga gikapoyan ug nabug-atan. Hatagan Ko kamo og Kapahulayan."

²⁴² Ug moingon mo, "Ah, batan-on pa man ko. Akong . . . Oh, ang akong pastor dili . . . Ang kinahanglan ko lang buhaton . . ." Kita n'yo? Dili n'yo gayud Kini mahikaplagan.

²⁴³ Pero kon moingon kamo, "Oo, Ginoo ko. Patalinghugan ko ang Imong Tingog. Dili ko pagahion ang akong kasingkasing. Dili ko igsapayan, Ginoo, Imo man Kining Pulong ug nagatoo

ako Kanimo. Dawata ako, Jesus, ‘Ania ako, nga wala na’y ubang hangyo, gawas sa Imong Dugo nga igaula para kanako. Ug busa magasaad ako, “Motoo ako.” Oh Cordero sa Dios, ania ako nga nagaduol.” Ipatong ang imong mga kamot nganha sa Iyang naghimalatyon nga ulo, moingon, “Ginoo, usa ako ka makakasala, ug gitawag Mo ako.”

244 “Ang tanan nga gikahatag Kanako sa Amahan magaari Kanako, ug pagabanhawon Ko siya sa kaulahiing mga adlaw.”

245 “Oo, Ginoo, nagaduol ako. Dili ko pagahion ang akong kasingkasing, sama sa gibuhat nila sa paghagit, nagatoo gayud ako.”

246 Dayon unsa ma’y buhaton Niya? Ihatag Niya kanimo ang Iyang Kinabuhi, *Zoe*, Kinabuhing Eternal. Ug kung gipatungha kita sa Dios gikan sa abog sa yuta, kon diin kita naggikan. . . Gikan ba kita sa abog? Ang tanan nga makita ninyo, nagagikan sa abog. Ug kung gihimo ako sa Dios sa kung unsa ako karon, nga walay unsa mang pagpili; pero tungod lang kay tinguha Niya nga himoon ako, ug hatagan ako og kahigayonan nga moatubang sa Kalbaryo ug magdesisyon; ug nagdesisyon na ako ug mitoo Kaniya; labi pa gayud nga Iya akong banhawon! Kung gibuhat Niya ako sa kung unsa ako, nga walay pagpili, dayon mipili ako ug gipasulod Siya; sa dihang gipatong Niya ang Iyang mga kamot sa Iyang Kaugalingon, ug nanumpa sa Iyang Kaugalingon, nga Iya akong pagabanhawon sa kaulahiing adlaw. Nakasigurado ako.

247 Aduna ako’y Kapahulayan, dili tungod kay nagasimba ako kada Dominggo, dili tungod kay nagasimba ako sa sabbath. Wala kana’y unsa man nga kahilambigan niini. Nagasimba ako tungod kay nakasulod na ako sa Iyang pakigdait ug Kapahulayan: pakigdait, kapahulayan, gugma, kalipay. Mohaguros man ang mga bagyo; nakakupot na ang akong angkla.

248 Naangkon n’yo ba kana nga kasinatian, karong gabhiona, higala ko nga ania karon niining mainit nga tabernakulo? Wala kamo mitambong aron maminaw kanako. Dili. Mitambong kamo aron mapatalinghugan ang Pulong. Paminaw, higala ko.

249 Karon kung wala pa ninyo naangkon ang maong Kapahulayan, makaplagnan n’yo Kini karon mismo. Dili n’yo na kinahanglan pang moduol dinhi sa may altar. Pabilin lang mo sa inyong gilingkoran. Magmatinuuron, ug moingon, “Cristo, manulti Ka sa akong kasingkasing. Kabalo ko nga mainit dinhi. Ako’y—ako gayu’y nabasa na, sa singot. Giigang gyud ako. Apan, Ginoo, sa tinuod lang, mahimong sington man ako tungod sa sakit, nga grabe pa kaysa niini, sa dili pa mobuntag.”

Ug molingo-lingo man ang doktor, og moingon, “Ataki kini sa kasingkasing. Wala na siya.” Dayon unsa na man?

250 Dayon unsa na man? Pag ablihan na ang dakung Libro, dayon unsa na man? Nadungog n'yo na tingali kining awit, *What Then?* “Pag kadtong mga nanagsalikway sa Mensahe, pangutan-on sila kung unsay ilang rason, dayon unsa na man?” Dayon unsa na man? Palandunga n'yo kini og ayo, karon.

251 Samtang ginaduko nato ang atong ulo, palandunga n'yo kini.

When the one that's rejecting this Message
tonight,
Going to be asked to give a reason—What then?
What then? What then?
When the great Book is opened, what then?
When the ones that's rejecting this Message
tonight,
You're going to be asked to give a reason—What
then?

252 Langitnong Amahan, kining tanan anaa na sa Imong mga kamot karon. Ania ang tinuod nga Sabbath nga anaa sa atubangan sa mga tawo. Ania ang Manulonda sa Dios, nga sulod sa nangaging pipila ka tuig, mikaylap gayud sa tibuok kalibutan. Ang mga kritiko ug tanan nang uban pa, naninguha silang kondenahon Kini. Apan, sa matag higayon, ginapamatud-an Mo gayud ang Imong Kaugalingon ingon nga Dios.

253 Ang kalibutan sa siyensiya, ang kalibutan sa iglesia; mga buta ba sila, Ginoo? Tingali'g dunay usa nga ania karong gabhiona ang gustong makadawat sa iyang panan-aw, aron padayon nga maglakaw, ug dili sulayan ang Dios, sama niadtong mga adlaw sa paghagit; dili nga sulayan Siya, pinaagi sa pagminaayo kada Dominggo, o saulogon ang usa ka adlaw, o ang usa ka kredo, o kaha magpamiyembro sa usa ka iglesia. Kondili gusto siya nga mahigawas na ug masirkunsidahan, diha sa kasingkasing, ug dawaton ang Balaang Espiritu. Ug nga tinguhaon nila Siya. Karon pinaagi'g pagtoo, ginapaninguha nilang madawat Siya sulod sa ilang kasingkasing. Ginapaninguha nila nga makakaplag og grasya diha Kanimo, Ginoo.

254 Oh, mahimong nakasulti na sila og laing mga pinulongan. Tingali'g nakasinggit na sila. Pero aduna gihapon sila nianang dugay na nga pagkamainiton sa ulo. Anaa gihapon kanila ang dugay nang pagkamadinauton. Nanagpanglibak gihapon sila ug nagatabi-tabi, ug ginabuhat ang mga butang nga dili nila unta angay'ng buhaton. Dili na nila gusto kana, Ginoo. Dayon unsa na man, pag ablihan na ang dakung Libro, nga ang ingon, “Ang mga ingon niana dili makasulod sa Ginghamarian?” “Busa magmahingpit kamo, ingon nga hingpit ang inyong Amahan nga atua sa Langit.” Ang unsa man nga wala makakab-ot niini dili gayud makasulod. Bug-os ba silang nagasalig, karong gabhiona,

sa gilansang sa krus? Kung dili pa, Ginoo, hinaut nga isulti na nila kanang usa ka Eternal nga “oo” karon mismo.

255 Moingon, “Ginoo, ako . . . Dili nga emosyon ra, kondili Aduna gyud ako’y nabati sulod sa akong kasingkasing, Butang nga nagasulti kanako, ‘Mahimo ko na kini karon mismo, pinaagi sa Imong grasya.’ Ug karon ginadawat ko Ikaw ingon nga personal kong Manluluwas. Akong—ako nang ginasalikway ang tanang mga butang nga iya sa kalibutan, ug gusto kong makasulod sa Imong Kapahulayan. Ug nagatoo ako nga ginabuhat ko kini karon mismo. Nagatoo ako nga ginadala na ako sa Balaang Espiritu mismo pasulod niana nga dapit.”

256 Samtang nakaduko ang matag ulo. Aduna ba sa inyo ang nakabati og ingon niana karon mismo? Ipataas n’yo ang inyong kamot, “Ginadala na ako karon sa Balaang Espiritu pasulod niana nga dapit kon diin dili na ako manglibak pa.” Panalanginan ka sa Dios. “Dili ko na buhaton ang mga ingon-anang butang. Nawala na ang pagkamainiton sa akong ulo. Mahimo ko nang magkinabuhi nga may pakigdait ug kalipay ug pagkamapuanguron, sukad karon mismo. Nagatoo ako nga nagapakigsulti ang Dios nganhi sa ako karon, nga mahimo ko na gyud kini sukad niining taknaa mismo, pinaagi sa Iyang grasya.” Mahimo bang ipataas mo ang imong mga kamot? Panalanginan ka sa Dios. Panalanginan sa Dios ang batan-ong babaye. Aduna pa ba? “Nagatoo na ako karon.”

257 Ayaw n’yo Siya sulayi, nga sama niadtong adlaw sa pagpangsupil. Ayaw n’yo hunahunaa nga tungod kay nagasimba kamo kada Dominggo, o ginasaulog n’yo ang sabbath. Miingon si Pablo, “Kamo nga nagasaulog og mga adlaw o mga bulan, o uban pa, nabalaka ako kaninyo. Ang kasugoan ingon nga maoy landong sa mga maayong butang nga umalabot, ug dili ang mismong dagway sa maong butang, dili gayud makahimo sa paghingpit sa magsisimba.” Apan ginahimo kamong hingpit ni Cristo, hingpit diha sa atubangan sa Dios. Ginatangtang Niya ang inyong sala, ginatangtang ang paghukom kaninyo, og ginahatag sa inyo ang Iyang gugma ug kalipay.

258 Mosulod na ba kamo sa Kapahulayan karon? Aduna pa ba’y magpataas sa ilang kamot, moingon, “Nabuhat ko na kini.” Panalanginan ka sa Dios, batan-ong babaye, dinhi dapit sa akong wala. Panalanginan sa Dios ang lalaki nga ania sa akong tuo. Ang pagsulod sa Iyang Kapahulayan, palandunga n’yo kini karon mismo.

259 Pag-ampo mo, “Ania ako, Ginoo, nga wala na’y ubang hangyo; wala’y maayo kanako. Wala ako’y unsa man nga ikahalad Kanimo, kondili ang ako lamang dugay nang, gikapoy nga, makasasalang kinabuhi. Dawaton Mo ba ako? Hinloan? Tabangan? Tungod kay, nagsaad ako nga motoo na ako. Oh Cordero sa Dios, ako nagaduol. Nagaduol ako karon, nagatoo

nga karon miagi na ako gikan sa kamatayon ngadto sa Kinabuhi. Tungod kay, dinhi mismo sa akong gilingkoran, gidawat ko na Ikaw ingon nga akong Manluluwas ug nabati ko gayud ang pakigdait sulod sa akong kasingkasing.”

²⁶⁰ Dunay lima nga nagpataas sa ilang mga kamot. Aduna pa ba’y usa, nga nakabati og ingon-ana, ipataas ang inyong kamot? Kung dili ka pa usa ka Cristohanon, dawata Siya karon dayon.

²⁶¹ Kung nagapamahayag ka ingon nga usa ka Cristohanon ug dili pa sa gihapon ingon niana, makasasala ka gihapon, bisan unsa pa ang kinabuhi nga imong—imong ginakinabuhi, o bisan unsa pa ang imong pagpaningkamot nga ihusto ang imong kaugalingon. Dili man madawat ang imong mga nabuhat. Kondili ang Iya lang gibuhat. Dili madawat ang kaugalingon mong pagkamatarung. Kung miundang ka na sa imong pagpanigarilyo tungod lang kay miingon ka, “Bueno, mas maayo pang moundang na ako sa pagpanigarilyo tungod nagapamahayag ako nga ako Cristohanon,” dili kana dawaton sa Dios. Kung miundang ka na sa pagpangibog sa mga babaye, tungod nga ginapugos mo ang imong kaugalingon nga buhaton kana, dili gihapon kana dawaton sa Dios. Butang kana nga ikaw mismo ang nagabuhat. Mga buhat kana. Grasya man ang nagaluwas kanimo. Mianha na ba ang Dios kanimo ug gitangtang na ang maong tibuok butang gikan kanimo? Mao kana ang sunod.

²⁶² Moingon mo, “Nagpamiyembro man gud ko sa iglesia, ug mao nga kinahanglan ko nang undangan kining mga butanga.” Dili kana dawaton sa Dios, wala gyud kamo’y unsa man nga ikahalad. Ang ginadawat lang Niya mao ang gihalad ni Cristo. Siya ang nagahatag kaninyo og Kinabuhing Eternal, ug maoy nagatangtang niana gikan kaninyo. Dawaton n’yo ba Kini?

. . . out on the stormy, wild sea,
Come, anchor your soul in the haven of rest,
And say, “My beloved is mine.”

I’ve anchored my soul . . .

Sige, mahimo n’yo nang iyahat ang inyong ulo. Tapos na ang mensahe. Magsimba na tà karon.

I’ll sail the wild sea no more;
The tempest may sweep over the wild, stormy
deep,
In Jesus I’m safe evermore.

²⁶³ Karon ang matag usa, magsimba na.

I’ve anchored my soul in a haven of rest,
(Sabbath.)
I’ll sail the wild sea no more;

The tempest may sweep over the wild, stormy
 deep,
 In Jesus I'm safe evermore.
 Shine on me . . .

Isurender n'yo lang ang inyong kaugalingon. Ipiyong n'yo ang inyong mga mata. Nabati n'yo ba ang maong maaghop nga Espiritu? Ingon-ana ang pagsimba. Tapos na ang mensahe. Pagsimba na kini.

Let the Light from the lighthouse shine on me;
 Oh, shine on me, O Lord, shine on me,
 Oh, let the Light from the lighthouse shine on
 me.

²⁶⁴ Pila man ang nagbati og maayo gayud? Ipataas n'yo ang inyong kamot. Kanang maaghop, mapainubsanon nga espiritu, ingon-ana Kini.

To be like Jesus, just to be like Jesus,
 On earth I long to be like Him;
 All through life's journey from earth to Glory,
 I only ask to be like . . .

Magsimba lamang.



MGA HEBREOHANON, KAPITULO KUWATRO CEB57-0901E

(Hebrews, Chapter Four)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Dominggo sa gabii, Septyembre 1, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org